

宋六十一名家詞

冊二



線

833.5

674

25-2

v. 2



由國家圖書館數位化、典藏

東坡詞

目錄

陽關曲三調

如夢令五調

生查子一調

昭君怨一調

點絳脣五調

浣溪沙四十四調

減字木蘭花二十四調

訴衷情三調

菩薩蠻二十一調

採桑子一調

卜算子二調

好事近三調

華清引一調

謁金門三調

清平樂一調

雙荷葉一調

更漏子一調

占春芳一調

烏夜啼一調

阮郎歸三調

虞美人影一調

西江月十三調

少年遊三調

瑤池燕一調

南柯子十九調

望江南二調

浪淘沙一調

鷓鴣天二調

玉樓春六調

南鄉子十六調

鵲橋仙二調

瑞鷓鴣二調

翻香令一調

虞美人八調

一斛珠一調

醉落魄三調

臨江仙十四調

蝶戀花十六調

荷華媚一調

漁家傲六調

定風波九調

十拍子一調

蘇幕遮一調

調笑令一調

行香子七調

青玉案一調

殢人嬌三調

江城子十三調

千秋歲一調

何滿子一調

祝英臺近一調

一叢花一調

皂羅特髻一調

洞仙歌二調

勸金船一調

意難忘一調

滿江紅五調

滿庭芳六調

水調歌頭五調

雨中花慢三調

八聲甘州一調

醉蓬萊一調

三部樂一調

念奴嬌二調

水龍吟六調

歸朝歡一調

永遇樂三調

無愁可解一調

沁園春一調

賀新郎一調

稍徧二調

戚氏一調

東坡詞目錄

東坡詞

宋

蘇軾

陽關曲中秋作本名小秦王入腔卽陽關曲
暮雲收盡溢清寒銀漢無聲轉玉盤此生此夜不長
好明月明年何處看

又軍中

受降城下紫髯郎戲馬臺南舊戰場恨君不取契丹
首金甲牙旗歸故鄉

又李公擇○舊刻重出

濟南春好雪初晴纔到龍山馬足輕使君莫忘雪溪
女時作陽關腸斷聲

如夢令元豐十年十二月十八日浴泗州雅熙

塔下戲作如夢令闕此曲本唐莊宗製名憶

仙姿嫌其名不雅故改爲如夢令蓋莊宗作

此詞卒章云如夢如夢和淚出門相送因取

以爲名

水垢何曾相受細看兩俱無有寄語揩背人盡日勞
君揮肘輕手輕手居士本來無垢

又同前

自淨方能洗彼我自汗流呀氣寄語澡浴人且共肉

宋六十一名家詞

東坡詞

一中華書局聚

國家圖書館



002512067

身遊戲但洗但洗俯爲人間一切

又有寄

爲向東坡傳語人在畫堂深處別後有誰來雪壓小橋無路歸去歸去江上一犁春雨

又春思

手種堂前桃李無限綠陰青子簾外百舌兒驚起五更春睡居士居士莫忘小橋流水

又題淮山樓

城上層樓疊巘城下清淮古汴舉手揖吳雲人與暮天俱遠魂斷魂斷後夜松江月滿

生查子 訴別

三度別君來此別真遲暮白盡老髭鬚明日淮南去酒罷月隨人淚溼花如霧後夜逐君還夢繞湖邊

路

昭君怨 送別

誰作桓伊三弄驚破綠窗幽夢新月與愁烟滿江天欲去又還不去明日落花飛絮送行舟水東流

點絳脣 己巳重九和蘇堅 〇舊刻七首攷醉漾

輕舟又月轉烏啼俱秦淮海作或云此二詞

又東坡有手迹流傳于世遂編入東坡詞然亦
不敢謂安知非秦詞蘇字耶今從宋本刪去

我輩情鍾古來誰似龍山宴而今楚甸戲馬餘飛觀
顧謂佳人不覺秋強半簫聲遠鬢雲撩亂愁入參
差雁

又庚午重九再用前韻

不用悲秋今年身健還高宴江村海甸總作空花觀
尚想橫汾蘭菊紛相半樓船遠白雲飛亂空有年
年雁

又再和送錢公永

莫唱陽關風流公子方終宴秦山禹甸縹渺真奇觀
北望平原落日山銜半孤帆遠我歌君亂一送西
飛雁

又杭州

閒倚胡牀庾公樓外峯千朵與誰同坐明月清風我
別乘一來有唱應須和還知麼自從添箇風月平
分破

又或刻賀方回

紅杏飄香柳含煙翠拖金縷水邊朱戶門掩黃昏雨
燭影搖風一枕傷春緒歸不去鳳樓何處芳草迷

歸路

浣溪沙新秋○舊刻四十五首攷風壓輕雲貼

水飛是李後主作玉梳冰寒滴露華是晏同
叔作俱刪去舊逸晚菊花前斂翠蛾一首今

增入

風捲珠簾自上鉤蕭蕭亂葉報新秋獨攜纖手上高樓
缺月向人舒窈窕三星當戶照綢繆香生霧縠
見纖柔

又遊蘄水清泉寺寺臨蘭溪溪水西流

山下蘭芽短浸溪松間沙路淨無泥蕭蕭暮雨子規啼
誰道人生無再少門前流水尚能西休將白髮
唱黃雞

又玄真子漁父云西塞山邊白鳥飛桃花流水

鱖魚肥青箬笠綠蓑衣斜風細雨不須歸此
語妙絕恨莫能歌者故增數語令以浣溪沙

歌之○或刻黃山谷

西塞山邊白鷺飛散花洲外片帆微桃花流水鱖魚肥
自庇一身青箬笠相隨到處綠蓑衣斜風細雨
不須歸

又十一月二日雨後微雪太守徐君猷攜酒見

過坐上作浣溪沙三首明日酒醒雪大作又
作二首

覆塊青青麥未蘇江南雲葉暗隨車
臨臯煙景世間無
雨腳半收簷斷綫雪林初下瓦疎珠
歸來冰顆亂黏鬚

又前韻

醉夢昏昏曉未蘇門前轆轤使君車
扶頭一盞怎生無
廢圃寒蔬挑翠羽小槽春酒凍真珠
清香細細嚼梅鬚

又前韻

雪裏餐氈例姓蘇使君載酒爲回車
天寒酒色轉頭無
薦士已聞飛鶚表報恩應不用蛇珠
醉中還許攬桓鬚

又再和前韻

半夜銀山上積蘇朝來九陌帶隨車
濤江煙渚一時無
空腹有詩衣有結溼薪如桂米如珠
凍吟誰伴捩髭鬚

又前韻

萬頃風濤不記蘇雪晴江上麥千車
但令人飽我愁無
翠袖倚風縈柳絮絳脣得酒爛櫻珠
尊前呵手

鐻霜鬚

又九月九日二首

珠檜絲杉冷欲霜山城歌舞助淒涼且餐山色飲湖光
共挽朱轡留半日強揉青蕊作重陽不知明日
爲誰黃

又和前韻

霜鬢真堪插拒霜哀絃危柱作伊涼暫時流轉爲風
光未遣清尊空北海莫因長笛賦山陽金釵玉腕
瀉鵝黃

又有感

傅粉郎君又粉奴莫教施粉與施朱自然冰玉照香
酥有客能爲神女賦憑君送與雪兒書夢魂東去
覓桑榆

又詠橘

菊暗荷枯一夜霜新苞綠葉照林光竹籬茆舍出青
黃香霧噴人驚半破清泉流齒怯初嘗吳姬三日
手猶香

又公守湖辛未上元日作會於伽藍中時長老

法惠在座人有獻翦伽花綵甚奇謂有初春

興因作浣溪沙二首寄袁公濟

雪領霜髯不自驚更將翦綵發春榮羞顏未醉已先
頽莫唱黃雞并白髮且呼張友喚殷兄有人歸去
欲卿卿

又和前韻

料峭東風翠幕驚云何不飲對公榮水精盤瑩玉鱗
頽花影莫辜三夜月朱顏未稱五年兄翰林子墨
主人卿

又徐門石潭謝雨道上作五首

照日深紅暖見魚連溪綠暗晚藏烏黃童白叟聚睢
盱麋鹿逢人雖未慣猿獠聞鼓不須呼歸家說與
採桑姑

又

旋抹紅妝看使君三三五五棘籬門相挨踏破菑羅
裾老幼扶攜收麥社烏鳶翔舞賽神村道逢醉叟
臥黃昏

又

麻葉層層綠葉光誰家煮繭一村香隔籬嬌語絡絲
娘垂白杖藜擡醉眼捋青搗麩軟飢腸問言豆葉
幾時黃

又

款款衣巾落棗花村南村北響繰車牛衣古柳賣黃
瓜酒困路長惟欲睡日高人渴漫思茶敲門試問
野人家

又

軟草平莎過雨新輕沙走馬路無塵何時收拾耦
身日暖桑麻光似發風來蒿艾氣如薰使君元是
此中人

又春情

道字嬌訛苦未成未應春閣夢多情朝來何事綠
鬟傾綵索身輕長趁燕紅窗睡重不聞鶯困人天
氣近清明

又菊節別元素

縹緲危樓紫翠間良辰樂事苦難全感時懷舊獨
凄然璧月瓊枝空夜夜菊花人貌自年年不知來
歲與誰看

又春情

桃李溪邊駐畫輪鷓鴣聲裏倒清尊夕陽雖好近黃
昏香在衣裳妝在臂水連芳草月連雲幾人歸去
不銷魂

又荷花

四面垂楊十里荷，問云何處最花多。畫樓南畔夕陽和。
天氣乍涼人寂寞，光陰須得酒消磨。且來花裏聽笙歌。

又贈閻邱朝議時過徐州

一別姑蘇已四年，秋風南浦送歸船。畫簾重見見水中仙。
霜鬢不須催我老，杏花依舊駐君顏。夜闌相對夢魂間。

又有贈

惟見眉間一點黃，詔書催發羽書忙。從教嬌淚洗紅妝。
上殿雲霄生羽翼，論兵齒頰帶風霜。歸來衫袖有天香。

又憶舊

長記鳴琴子賤堂，朱顏綠髮映垂楊。如今秋鬢數莖霜。
聚散交遊如夢寐，升沈閒事莫思量。仲卿終不避桐鄉。

又紹聖元年十月十三日與程鄉令侯晉叔歸

安簿譚汲遊大口寺野飲松下設松黃湯作
此闋余近釀酒名萬家春蓋嶺南萬戶酒也

羅襪空飛洛浦塵，錦袍不見見謫仙。神攜壺藉草亦天真。
玉粉輕黃千歲藥，雪花浮動萬家春。醉歸江路

野梅新

又重九

白雪清詞出坐間愛君才器兩俱全異鄉風景却依然
可恨相逢能幾日不知重會是何年茱萸子細
更重看

又元豐七年十月二十四日從泗洲劉倩叔遊

南山

細雨斜風作曉寒淡煙疎柳媚晴灘入淮清洛漸漫
漫雪沫乳花浮午盞蓼芽蒿筍試春盤人間有味
是清歡

又送梅庭老赴潞州學官

門外東風雪灑裾山頭回首望三吳不應彈鋏爲無
魚上黨從來天下脊先生元是古之儒時平不用
魯連書

又徐州藏春閣園中

慚愧今年二麥豐千畦翠浪舞晴空化工餘力染天
紅歸去山公應倒載闌街拍手笑兒童甚時名作
錦薰籠

又揚州賞芍藥櫻桃

芍藥櫻桃兩鬪新名園高會送芳辰洛陽初夏廣陵

春紅玉半開菩薩面丹砂穠點柳枝脣尊前還有
箇中人

又贈楚守田待制小鬟

學畫鴟兒正妙年陽城下蔡困嫣然憑君莫唱短因
緣霧帳吹笙香嫋嫋霜庭按舞月娟娟曲終紅袖
落雙纏

又和前韻

一夢紅湖費五年歸來風物故依然相從一醉是前
緣遷客不應常耗躁使君爲出小嬋娟翠鬟聊著
小詩纏

又端午

輕汗微微透碧紈明朝端午浴芳蘭流香漲膩滿晴
川綵線輕纏紅玉臂小符斜挂綠雲鬟佳人相見
一千年

又感舊

徐邈能中酒聖賢劉伶席地幕青天潘郎白壁爲誰
連無可奈何新白髮不如歸去舊青山恨無人借
買山錢

又自適

傾蓋相逢勝白頭故山空復望松楸此心安處是菟

裘 賣劍買牛真欲老 乞漿得酒更何求 願爲辭社
宴春秋

又 寓意和前韻

炙手無人傍屋頭 蕭蕭晚雨脫梧楸 誰憐季子傲貂
裘 顧我已無當世望 似君須向古人求 歲寒松柏
肯驚秋

又 卽事

畫隼橫江喜再遊 老魚跳檻識清謳 流年未肯付東
流 黃菊籬邊無悵望 白雲鄉裏有溫柔 挽回霜鬢
莫教休

又 方響

花滿銀塘水漫流 犀槌玉板奏涼州 順風環珮過秦
樓 遠漢碧雲輕漠漠 今宵人在鵲橋頭 一聲敲徹
絳河秋

又 端午

入袂輕風不破塵 玉簪犀壁醉佳辰 一番紅粉爲誰
新 團扇只堪題往事 新絲那解繫行人 酒闌滋味
似殘春

又

幾共查梨到雪霜 一經題品便生光 木奴何處避雌

黃 北客有來初未識南金無價喜新嘗含滋嚼句
齒牙香

又

山色橫侵蘸暈霞湘川風靜吐寒花遠林屋散尚啼
鴉 夢到故園多少路酒醒南望隔天涯月明千里
照平沙

又重陽○舊刻逸

晚菊花前斂翠蛾授花傳酒緩聲歌柳枝團扇別離
多 擁髻淒涼論舊事曾隨織女度銀梭當年今夕
奈愁何

減字木蘭花自錢塘被召林子中作郡守有會
坐中營妓出牒鄭容求落籍高瑩求從良子
中呈東坡東坡索筆爲減字木蘭花書牒後
時用鄭容落籍高瑩從良八字於句端也兼
贈潤守許仲途

鄭莊好客容我尊前先墮幘落筆生風籍籍聲名不
負公 高山白早瑩骨冰膚那解老從此南徐良夜
清風月滿湖

又寓意

雲鬟傾倒醉倚闌干風月好憑仗相扶誤入仙家碧

玉壺 連天衰草不走湖南西去道一舸姑蘇便逐
鴟夷去得無

又荔枝

閩溪珍獻過海雲帆來似箭玉座金盤不貢奇葩四
百年 輕紅釀白雅稱佳人纖手擘骨細肌香恰是
當年十八娘

又送東武令趙晦之

賢哉令尹三仕已之無喜愠我獨何人猶把虛名玷
搢紳 不如歸去二頃良田無覓處歸去來兮待有
良田是幾時

又送別

玉觴無味中有佳人千點淚學道忘憂一念還成不
自由 如今未見歸去東園花似霰一語相開匹似
當初本不來

又送趙令

春光亭下流水如今何在也歲月如梭白首相看擬
奈何 故人重見世事年來千萬變官況闌珊慚愧
青松守歲寒

又過吳興李公擇生子三日會客作此詞戲之

惟熊佳夢釋氏老君曾抱送壯氣橫秋未滿三朝已

食牛 犀錢玉果利市平分沾四座多謝無功此事
如何到得儂

又得書

曉來風細不會鵲聲來報喜却羨寒梅先覺春風一
夜來 香牋一紙寫盡回紋機上意欲卷重開讀徧
千回與萬回

又送別

天台舊路應恨劉郎來又去別酒頻傾忍聽陽關第
四聲 劉郎未老懷戀仙鄉重得到只恐因循不見
如今勸酒人

又錢塘西湖有詩僧清順居其上自名藏春塢

門前有二古松各有凌霄花絡其上上順常晝
臥其下子瞻爲郡一日屏騎從過之松風騷
然順指落花覓句子瞻爲賦此詞

雙龍對起白甲蒼髯煙雨裏疎影微香下有幽人晝
夢長 湖風清軟雙鵲飛來爭噪晚翠颭紅輕時下
凌霄百尺英

又贈小鬟琵琶

琵琶絕藝年記都來十一二撥弄幺絃未解將心指
下傳 主人嗔小欲向東風先醉倒已屬君家且更

從容等待他

又立春

春牛春杖無限春風來海上便與春工染得桃紅似
肉紅
春幡春勝一陣春風吹酒醒不似天涯捲起
楊花似雪花

又雪詞

雪容皓白破曉玉英紛似織風力無端欲學楊花更
耐寒
相如未老梁苑猶能陪俊少莫惹閒愁且折
江梅上小樓

又

玉房金蕊宜在玉人纖手裏淡月朦朧更有微微弄
袖風
溫香熟美醉慢雲鬟垂兩耳多謝春工不是
花紅是玉紅

又春月

春庭月午搖蕩香醪光欲舞步轉迴廊半落梅花婉
婉香
輕風薄霧總是少年行樂處不似秋光只與
離人照斷腸

又贈勝之

天然宅院賽了千千并萬萬說與賢知表德元來是
勝之
今來十四海裏猴兒奴子是要賭休癡六隻

骰兒六點兒

又琴

神閒意定萬籟收聲天地靜玉指冰絃未動宮商意已傳
悲風流水寫出寥寥千古意歸去無眠一夜餘音在耳邊

又

銀箏旋品不用纏頭千尺錦妙思如泉一洗閒愁十五年
爲公少止起舞屬公公莫起風裏銀山擺撼魚龍我自閒

又贈君猷家姬

柔和性氣雅稱佳名呼懿懿解舞能謳絕妙年中有品流
眉長眼細淡淡梳妝新綰髻懊惱風情春著花枝百態生

又

鶯初解語最是一年春好處微雨如酥草色遙看近却無
休辭醉倒花不看開人易老莫待春回顛倒紅英間綠苔

又

江南遊女問我何年歸得去雨細風微雨足如霜挽紵衣
江亭夜語喜見京華新樣舞蓮步輕飛遷客

今朝始是歸

又贈徐君猷三侍人之一嫵卿

嬌多媚嫩體柳輕盈千萬態
嬌主尤賓歛黛含嚙喜
又噴
徐君樂飲笑謔從伊情意恁
臉嫩膚紅花倚
朱闌裏住風

又勝之

雙鬟綠墜嬌眼橫波眉黛翠
妙舞蹁躑掌上身輕意
態妍
曲窮力困笑倚人旁香喘噴
老大逢歡昏眼
猶能仔細看

又慶姬

天真雅麗容態溫柔心性慧
響亮歌喉遏住行雲翠
不收
妙詞佳曲轉出新聲能斷續
重客多情滿勸
金卮玉手擎

訴衷情 送述古迓元素

錢塘風景古來奇
太守例能詩
先驅負弩何在
心已
浙江西
花盡後葉飛時
雨淒淒若爲情緒
更問新
官向舊官啼

又海棠 ○ 又刻晏同叔

海棠珠綴一重重
清曉近簾櫳
胭脂誰與勻
淡偏向
臉邊濃
看葉嫩惜花紅
意無窮
如花似葉
歲歲年

年共占春風

又琵琶女

小蓮初上琵琶絃
彈破碧雲天
分明繡閣幽恨都向
曲中傳
膚瑩玉鬢梳
蟬倚窗前素娥今夜故故隨
人似鬪嬋娟

菩薩蠻 歌妓

繡簾高捲傾城出
燈前澹澹橫波溢
皓齒發清歌
春山入翠蛾
悽音休怨亂
我已先偷玩梅萼
月窗虛
纍纍一串珠

又

碧紗微露纖纖玉
一曲雲和湘水綠
越調變新聲
龍吟徹骨清
夜長殘酒醒
頓覺霜袍冷
不見意中人
新啼壓舊痕

又西湖

秋風湖上蕭蕭雨
使君欲去還留住
今日漫留君
明朝愁殺人
尊前千點淚
灑向長河水
不用斂雙蛾
路人啼更多

又杭妓往蘇

玉童西迓浮邱伯
洞天冷落秋蕭瑟
不用許飛瓊
瑤臺空月明
清香凝夜宴
借與韋郎看
莫便過姑蘇

扁舟下五湖

又闕文

天憐豪俊□□□□向松江滿□景為淹留從

君都占秋身閒惟□□□□遊遊首帝夢□□□

匆匆歸去時

又代妓送陳述古

娟娟缺月西南落相思撥斷琵琶索枕淚夢魂中覺
來眉暈重畫堂堆燭淚長笛吹新水醉客各西東
應思陳孟公

又感舊

玉笙不受珠脣暖離聲淒咽胸填滿遺恨幾千秋恩
留人不留他年京國酒泣淚攀枯柳莫唱短因緣
長安遠似天

又新月

畫簷初挂彎彎月孤光未滿先憂缺還認玉簾鉤天
孫梳洗樓佳人言語好不願求新巧此恨固應知
願人無別離

又七夕

風迴仙□□開扇更闌月墜星河轉枕上夢魂驚曉
簷疎雨零相逢雖草草長共天難老終不羨人閒

人閒夜似年

又有寄

城隅靜女何人見先生日夜歌彤管誰識蔡姬賢江
南顧彥先先生那久困湯沐須名郡惟有謝夫人
從來見擬倫

又

買田陽羨吾將老從來只爲溪山好來往一虛舟聊
隨物外遊有書仍懶著水調歌歸去筋力不辭詩
要須風雨時

又回文

落花閒院春衫薄薄衫春院閒花落遲日恨依依
依恨日遲夢回鶯舌弄弄舌鶯回夢郵便問人羞
羞人問便郵

又夏景回文

火雲凝汗揮珠顆顆珠揮汗凝雲火瓊暖碧紗輕輕
紗碧暖瓊暈腮嫌枕印印枕嫌腮暈閒照晚妝殘
殘妝晚照閒

又回文

嶠南江淺紅梅小小梅紅淺江南嶠窺我向疎籬籬
疎向我窺老人行卽到到卽行人老離別惜殘枝

枝殘惜別離

又回文春閨怨

翠鬟斜慢雲垂耳耳垂雲慢斜鬟翠春晚睡昏昏昏
昏睡晚春細花梨雪墜墜雪梨花細鬢淺念誰人
人誰念淺鬢

又回文夏閨怨

柳庭風靜人眠晝晝眠人靜風庭柳香汗薄衫涼涼
衫薄汗香手紅冰腕藕藕腕冰紅手郎笑藕絲長
長絲藕笑郎

又回文秋閨怨

井梧雙照新妝冷冷妝新照雙梧井羞對井花愁愁
花井對羞影孤憐夜永永夜憐孤影樓上不宜愁
愁宜不上樓

又回文冬閨怨

雪花飛暖融香頰頰香融暖飛花雪欺雪任單衣衣
單任雪欺別時梅子結結子梅時別歸不恨開遲
遲開恨不歸

又

娟娟侵鬢妝痕淺雙鬢相媚彎如翦一翦百般宜無
論笑與啼酒闌思翠被特故騰騰地生怕促歸輪

微波先泥人

又詠足

塗香莫惜蓮承步長愁羅襪凌波去只見舞迴風都
無行處蹤偷穿宮樣穩並立雙趺困纖妙說應難
須從掌上看

又

玉環墜耳黃金飾輕衫罩體香羅碧緩步困春醪春
融臉上桃花鈿從委地誰與郎爲意長愛月華清
此時憎月明

採桑子潤州東景樓與孫巨源相遇

多情多感仍多病多景樓中尊酒相逢樂事回頭一
笑空停杯且聽琵琶語細撚輕攏醉臉春融斜照
江天一抹紅

卜算子感舊

蜀客到江南長憶吳山好吳蜀風流自古同歸去應
須早還與去年人共藉西湖草莫惜尊前仔細看
應是容顏老

又惠州有溫都監女頗有色年十六不肯嫁人

聞坡至甚喜每夜聞坡諷詠則徘徊窗下坡
覺而推窗則其女踰牆而去坡從而物色之

曰吾嘗呼王郎與之子爲媼未幾而坡過海
女遂卒葬於沙灘側坡回惠爲賦此詞

缺月挂疎桐漏斷人初靜時見幽人獨往來縹緲孤
鴻影驚起却回頭有恨無人省揀盡寒枝不肯棲
寂寞沙洲冷一刻楓落吳江冷

好事近送君猷

紅粉莫悲啼俯仰半年離別看取雪堂坡下老農夫
淒切明年春水漾桃花柳岸隘舟楫從此滿城歌
吹看黃州鬪咽

又元刻不載

煙外倚危樓初見遠燈明滅却跨玉虹歸去看洞天
星月當時張范風流在況一尊浮雪莫問世間何
事與劍頭微吷

又湖上

湖上雨晴時秋水半篙初沒朱檻俯窺寒鑑照衰顏
華髮醉中欲墮白綸巾溪風漾流月獨棹小舟歸
去任煙波飄兀

華清引感舊

平時十月幸蓮湯玉鬢瓊梁五家車馬如水珠璣滿
路旁翠華一去掩方牀獨留烟樹蒼蒼至今清夜

月依舊過繚牆

謁金門 秋夜

秋帷裏長漏伴人無寐低玉枕涼輕繡被一番秋氣
味曉色又侵窗紙窗外雞聲初起聲斷幾聲還到
耳已明聲未已

又秋興

秋池閣風傍曉庭簾幕霜葉未衰吹未落半驚鴉喜
鵲自笑浮名情薄似與世人疎略一片懶心雙懶
脚好教閒處著

又秋感

今夜雨斷送一年殘暑坐聽潮聲來別浦明朝何處
去辜負金尊綠醕來歲今宵圓否酒醒夢回愁幾
許夜闌還獨語

清平樂 秋詞

清淮濁汴更在江西岸紅旆到時黃葉亂霜入梁王
故苑秋原何處攜壺停驂訪古踟躕雙廟遺風尚
在漆園傲吏應無

雙荷葉

雙溪月清光偏照雙荷葉雙荷葉紅心未偶綠衣偷
結背風迎雨淚珠滑輕舟短棹先秋折先秋折煙

鬢未上玉杯微缺

更漏子送孫巨源

水涵空山照市西漢二疎鄉里新白髮舊黃金故人
恩義深海東頭山盡處自古客槎來去槎有信赴
秋期使君行不歸

占春芳

紅杏了天桃盡獨自占春芳不比人間蘭麝自然透
骨生香對酒莫相忘似佳人兼合明光只憂長笛
吹花落除是寧王

烏夜啼寄遠

莫怪歸心甚速西湖自有蛾眉若見故人須細說白
髮倍當時小鄭非常強記二南依舊能詩更有鱸
魚堪切膾兒輩莫教知

阮郎歸初夏

綠槐高柳咽新蟬薰風初入絃碧紗窗下水沈煙棊
聲驚晝眠微雨過小荷翻榴花開欲然玉盆纖手
弄清泉瓊珠碎又圓

又集句梅花○舊重刻醉桃源香腮作宮妝暮

春作暮雲

暗香浮動月黃昏堂前一樹春東風何事入西鄰兒

家常閉門 雪肌冷玉容真香腮粉未勻折花欲寄
隴頭人江南日暮春

又蘇州席上作

一年三度過蘇臺清尊長是開佳人相問苦相猜這
回來不來 情未盡老先催人生真可哈他年桃李
阿誰栽劉郎雙鬢摧

虞美人影暮春

華胥夢斷人何處聽得鶯啼紅樹幾點薔薇香雨寂
寞閒庭戶 暖風不解留花花住片片著人無數樓上
望春歸去芳草迷歸路

西江月真覺賞瑞香

公子眼花亂發老夫鼻觀先通領巾飄下瑞香風驚
起謫仙春夢 后土祠中玉蕊蓬萊殿後鞞紅此花
清絕更纖穠把酒何人心動

又坐客見和復次韻

小院朱闌幾曲重城畫鼓三通更看微月轉光風歸
去香雲入夢 翠袖爭浮大白阜羅半插斜紅燈花
零落酒花穠妙語一時飛動

又再用前韻戲曹子方坐客云瑞香爲紫丁香
遂以此曲辯證之

怪此花枝怨泣託君詩句名通憑將草木記吳風繼
取相如雲夢點筆袖沾醉墨謗花面有慚紅知君
卻是爲情穠怕見此花撩動

又

聞道雙銜鳳帶不妨單著鮫綃夜香知與阿誰燒悵
望水沈煙裊雲鬢風雲綠卷玉顏醉裏紅潮莫教
空度可憐宵月與佳人共撩

又重九

點點樓頭細雨重重江外平湖當年戲馬會東徐今
日淒涼南浦莫恨黃花未吐且教紅粉相扶酒闌
不必看茱萸頰仰人間今古

又送茶并谷簾與王勝之

龍焙今年絕品谷簾自古珍泉雪芽雙井散神仙苗
裔來從北苑湯發雲腴醜白盞浮花乳輕圓人間
誰敢更爭妍鬪取紅窗粉面

又姑熟再見勝之女前韻○或刻山谷詞

別夢已隨流水淚巾猶裊香泉相如依舊是臞仙人
在瑤臺閬苑花霧縈風縹緲歌珠滴水清圓蛾眉
新作十分妍走馬歸來便面

又黃州中秋

世事一場大夢，人生幾度秋涼。夜來風葉已鳴廊。看取眉頭鬢上。酒賤常愁客少，月明多被雲妨。中秋誰與共孤光。把盞淒然北望。

又送錢待制

莫歎平原落落，且應去魯遲遲。與君各記少年時。須信人生如寄。白髮千莖相送，深杯百罰休辭。拍浮何用酒爲池。我已爲君德醉。

又梅花

玉骨那愁瘴霧，冰肌自有仙風。海仙時遣探芳叢。倒掛綠毛幺鳳。素面翻嫌粉澹，洗妝不褪脣紅。高情已逐曉雲空。不與梨花同夢。惠州梅花上，珍禽曰：倒掛子似綠毛鳳而小。

又春夜行蘄水中，過酒家飲酒醉，乘月至一溪橋上，解鞍曲肱少休，及覺已曉，亂山葱蘢，不謂人世也。書此詞於橋柱上。

照野瀾瀾淺浪橫，空曖曖微霄障。泥未解，玉驄驕我欲醉眠芳草。可惜一溪明月，莫教踏碎瓊瑤解鞍欹枕綠楊橋。杜宇數聲春曉。

又平山堂

三過平山堂，下半生彈指聲中，十年不見老仙翁。壁

上龍蛇飛動 欲弔文章太守仍歌楊柳春風休言
萬事轉頭空未轉頭時皆夢

又蘇州交代林子中席上作

昨日扁舟京口今朝馬首長安舊官何物與新官只
有湖山公案 此景百年幾變箇中下語千難使君
才氣卷波瀾與把新詩判斷

少年遊端午贈黃守徐君猷

銀塘朱檻麴塵波圓綠卷新荷蘭條薦浴菖花釀酒
天氣尚清和好將沈醉酬佳節十分酒十分歌獄
草煙深認庭人悄無恠宴遊過

又黃之僑人郭氏每歲正月迎紫姑神以箕爲

腹箸爲口畫灰盤中爲詩敏捷立成余往觀
之神請予作少年遊乃以此戲之

玉肌鉛粉傲秋霜準擬鳳呼凰伶倫不見見清香未吐
且糠粃吹揚 到處成雙君獨隻空無數爛文章一
點香檀誰能借箸無復似張良

又潤州作

去年相送餘杭門外飛雪似楊花今年春盡楊花似
雪猶不見還家 對酒捲簾邀明月風露透窗紗恰
似嫦娥憐雙燕分明照畫梁斜

瑤池燕琴曲有瑤池燕變其詞作闋怨寄陳季

常

飛花成陣春心困寸寸別腸多少愁悶無人問偷啼
自搵殘妝粉 抱瑤琴尋出新韻玉纖趁南風未解
幽愠低雲鬢眉峯斂暈嬌和恨

南柯子 遊賞

山與歌眉斂波同醉眼流遊人都上十三樓不羨竹
西歌吹古揚州 菰黍連昌歎瓊彝倒玉舟誰家水
調唱歌頭聲繞碧山飛去晚雲留

又湖景和前韻

古岸開青葢新渠走碧流會看光滿萬家樓記取他
年扶路入西州 佳節連梅雨餘生寄葉舟只將菱
角與雞頭更有月明千頃一時留

又寓意

雨暗初疑夜風回忽報晴淡雲斜照著山明細草輕
沙溪路馬蹄輕 卯酒醒還困仙材夢不成藍橋何
處覓雲英只有多情流水伴人行

又和前韻

日出西山雨無晴又有晴亂山深處過清明不見綵
繩花板細腰輕 盡日行桑野無人與目成且將新

句琢瓊英我是世間閒客此閒行

又再用前韻

帶酒衝山雨和衣睡晚晴不知鐘鼓報天明夢裏栩栩然蝴蝶一身輕
老去才都盡歸來計未成求田問舍笑豪英自愛湖邊沙路免泥行

又晚春

日薄花房綻風和麥浪輕夜來微雨洗郊坰正是一年春好近清明
已改煎茶火猶調入粥錫使君高會之餘清此樂無聲無味最難名

又八月十八日觀潮

海上乘槎侶仙人萼綠華飛昇元不用丹砂住在潮頭來處渺天涯
雷輓夫差國雲翻海若家坐中安得弄琴牙寫取餘聲歸向水仙誇

又再用前韻

苒苒中秋過蕭蕭兩鬢華寓身化世一塵沙笑看潮來潮去了生涯
方士三三山路漁人一葉家早知身世兩聳牙好伴騎鯨公子賦雄誇

又東坡守錢塘無日不在西湖嘗攜妓謁大通

禪師大通愠形於色東坡作長短句令妓歌之

師唱誰家曲宗風嗣阿誰借君拍板與門槌我也逢
場作戲莫相疑 溪女方偷眼山僧莫眨眼卻愁彌
勒下生遲不見老婆三五少年時

又別潤州許仲途

欲執河梁手還升月日堂酒闌人散月侵廊北客明
朝歸去雁南翔 窈窕高明玉風流鄭季莊一時分
散水雲鄉惟有落花芳草斷人腸

又湖州作

山雨瀟瀟過溪橋瀏瀏清小園幽榭枕蘋汀門外月
華如水綵舟橫 峇岸霜花盡江湖雪陣平兩山遙
指海門青回首水雲何處覓孤城

又暮春

紫陌尋春去紅塵拂面來無人不道看花回惟見石
榴新蕊一枝開 冰簟堆雲髻金尊灑玉醅綠陰青
子莫相催留取紅巾千點照池臺

又黃州臘月八日飲懷民小閣

衛霍元勳後韋平外族賢吹笙只合在緱山閒駕綵
鸞歸去趁新年 烘暖燒香閣輕寒浴佛天他時一
醉畫堂前莫忘故人憔悴老江邊

又有感

宋六十一名家詞 東坡詞 七 中華書局聚

笑怕薔薇冒行憂寶瑟僵美人依約在西廂只恐暗中迷路認餘香
午夜風翻幔三更月到牀簾紋如水玉肌涼何物與儂歸去有殘妝

又感舊

才恨誰云短綿綿豈易裁半生眉綠未曾開明月好風閒處是人猜
春雨消殘凍溫風到冷灰尊前一曲爲誰哉留取曲終一拍待君來

又楚守周豫出舞鬟因作二首贈之

紺綰雙蟠髻雲欹小偃巾輕盈紅臉小腰身疊鼓忽催花拍鬪精神
空闕輕紅歇風和約柳春蓬山才調最清新勝似纏頭千錦共藏珍

又同前

琥珀裝腰佩龍香入領巾只應飛燕是前身共看剝葱纖手舞凝神
柳絮風前轉梅花雪裏春鴛鴦翡翠兩爭新但得周郎一顧勝珠珍

又舞妓

雲鬢裁新綠霞衣曳曉紅待歌凝立翠筵中一朶彩雲何事下巫峯
趁拍鸞飛鏡回身燕漾空莫翻紅袖過簾櫳怕被楊花勾引嫁東風

又

見說東園好能消北客愁雖非吾土且登樓行盡江南南岸此淹留短日明楓纈清霜暗菊球流年回首付東流憑仗挽回潘鬢莫教秋

望江南

春未老風細柳斜斜試上超然臺上看半壕春水一城花煙雨暗千家寒食後酒醒卻咨嗟休對故人思故國且將新火試新茶詩酒趁年華

又暮春

春已老春服幾時成曲水浪低蕉葉穩舞雩風軟苧羅輕酣詠樂昇平微雨過何處不催耕百舌無言桃李盡柘枝深處鶉鴝鳴春色屬蕪菁

浪淘沙探春

昨日出東城試探春情牆頭紅杏暗如傾檻內羣芳芽未吐早已回春綺陌斂香塵雪霽前村東君用意不辭辛料想春光先到處吹綻梅英

鷓鴣天時謫黃州。舊刻三首攷西塞山前白鷺飛一首是黃山谷作今刪去

鷺飛一首是黃山谷作今刪去

林斷山明竹隱牆亂蟬衰草小池塘翻空白鳥時時見照水紅蕖細細香村舍外古城旁杖藜徐步轉斜陽殷勤昨夜三更雨又得浮生一日涼

又陳公密出侍兒素娘歌紫玉簫曲勸老人酒
老人飲盡因為賦此詞

笑撚紅牙鞞翠翹揚州十里最妖嬈夜來綺席親曾
見撮得精神滴滴嬌嬌後眼舞時腰劉郎幾度欲
魂消明朝酒醒知何處腸斷雲閒紫玉簫

玉樓春 次歐公西湖韻

霜餘已失長淮闊空聽潺潺清瀨咽佳人猶唱醉翁
詞四十二年如電抹草頭秋露流珠滑三五盈盈
還二八與予同是識翁人惟有西湖波底月

又次馬中玉韻

知君仙骨無寒暑千載相逢猶日暮故將別語惱佳
人要看梨花枝上語落花已逐迴風去花本無心
鶯自訴明朝歸路下塘西不見鶯啼花落處

又宿造口聞夜雨寄子由才叔

梧桐葉上三更雨驚破夢魂無覓處夜涼枕簟已知
秋更聽寒蛩促機杼夢中歷歷來時路猶在江亭
醉歌舞尊前必有問君人為道別來心與緒

又

元宵似是歡遊好何況公庭民訟少萬家遊賞上春
臺十里神仙迷海島平原不似高陽傲促席雍容

陪語笑坐中有客最多情不惜玉山拚醉倒

又

經旬未識東君信一夕薰風來解愠紅綃衣薄麥秋

寒綠綺韻低梅雨潤瓜頭綠染山光嫩弄色金桃

新傅粉日高慵捲水晶簾猶帶春醪紅玉困

又上三調元刻不載

高平四面開雄壘三月風光初覺媚園中桃李使君

家城上亭臺遊客醉歌翻楊柳金尊沸飲散憑闌

無限意雲深不見見玉關遙草細山重殘照裏

南鄉子春情

晚景落瓊杯照眼雲山翠作堆認得岷峨春雪浪初

來萬頃蒲萄漲淥醅暮雨暗陽臺亂灑高樓溼粉

腮一陣東風來捲地吹迴落照江天一半開

又梅花詞和楊元素

寒雀滿疎籬爭抱寒柯看玉蕤忽見客來花下坐驚

飛踏散芳英落酒卮痛飲又能詩坐客無氍醉不

知花盡酒闌春到也離離一點微酸已著枝

又席上勸李公擇酒

不到謝公臺明月清風好在哉舊日髯孫何處去重

來短李風流更上才秋色漸摧頽滿院黃英映酒

杯看取桃花春二月爭開盡是劉郎去後栽

又重九涵輝樓呈徐君猷

霜降水痕收淺碧鱗鱗露遠洲酒力漸消風力軟
颼颼破帽多情卻戀頭佳節若為酬但把清尊斷送
秋萬事到頭都是夢休休明日黃花蝶也愁

又送述古

回首亂山橫不見居人只見城誰似臨平山上塔亭
亭迎客西來送客行臨路晚風清一枕初寒夢不
成今夜殘燈斜照處熒熒秋雨晴時淚不晴

又有感

冰雪透香肌姑射仙人不似伊濯錦江頭新樣錦非
宜故著尋常淡薄衣暖日下重幃春睡香凝索起
遲曼倩風流緣底事當時愛被西真喚作兒

又和楊元素

東武望餘杭雲海天涯兩杳茫何日功名遂了還
鄉醉笑陪公三萬場不用訴離觴痛飲從來別有
腸今夜送歸燈火冷河塘墮淚羊公卻姓楊

又自述

涼簟碧紗幮一枕清風晝睡餘臥聽晚衙無一事徐
徐讀盡牀頭幾卷書搔首賦歸歟自覺功名懶更

疎若問使君才與術何如占得人間一味愚

又沈強輔雯上出犀麗玉作胡琴送元素還朝

同子野各賦一首

裙帶石榴紅卻水殷勤解贈儂應許逐雞雞莫怕相逢一點靈犀必暗通何處遇良工琢刻天真半欲空願作龍香雙鳳撥輕攏長在環兒白雪胸

又贈行

旌旆滿江湖詔發樓船萬舳艫投筆將軍因笑我迂儒帕首腰刀是丈夫粉淚怨離居喜子垂窗報捷書試問伏波三萬語何如一斛明珠換綠珠

又雙荔枝

天與化工知賜得衣裳總是緋每向華堂深處見憐伊兩箇心腸一片兒自小便相隨綺席歌筵不暫離苦恨人人分析破東西怎得成雙似舊時

又集句

寒玉細凝膚吳融清歌一曲倒金壺鄭谷杏葉菖條徧相識李商隱爭如豆蔻花梢二月初杜牧年少卽須臾白居易芳時偷得醉工夫白居易羅帳細垂銀燭背韓渥歡娛豁得平生俊氣無杜牧

又集句

悵望送春杯杜牧漸老逢春能幾回杜甫花滿楚城
愁遠別許渾傷懷何況清絲急管催劉禹錫吟斷
望鄉臺李商隱萬里歸心獨上來許渾景物登臨閒
始見杜牧徘徊一寸相思一寸灰李商隱

又集句

何處倚闌干杜牧絃管高樓月正圓杜牧蝴蝶夢中
家萬里崔塗依然老去愁來強自寬杜甫明鏡借
紅顏李商隱須著人閒比夢閒韓愈蠟燭半籠金翡翠
翠李商隱更闌繡被焚香獨自眠許渾

又用韻和道輔

未倦長卿遊漫舞天歌爛不收不是使君能矯世誰
留教有瓊梳脫麝油香粉鏤金裘花豔紅箋筆欲
流從此丹脣并皓齒清柔唱徧山東一百州

又用前韻贈田叔通家舞鬟

繡鞅玉環遊燈晃簾踈笑卻收久立香車催欲上還
留更且檀脣點杏油花徧六么毬面旋迴風帶雪
流春入腰肢金縷細輕柔種柳應須柳柳州

鵲橋仙七女

緜山仙子高情雲渺不學癡牛駃女鳳簫聲斷月明
中舉手謝時人欲去客槎曾犯銀河微浪尚帶天

風海雨相逢一醉是前緣風雨散飄然何處

又七夕和蘇堅韻

乘槎歸去成都何在萬里江沱漢漾與君各賦一篇
詩留織女鴛鴦機上還將舊曲重賡新韻須信吾
儕天放人生何處不兒嬉看乞巧朱樓綵舫

瑞鷓鴣觀潮

碧山影裏小紅旗儂是江南踏浪兒拍手欲嘲山簡
醉齊聲爭唱浪婆詞西興渡口帆初落漁浦山頭
日未欹儂欲送潮歌底曲尊前還唱使君詩

又

城頭月落尚啼烏朱艦紅船早滿湖鼓吹未容迎五
馬水雲先已漾雙鳧映山黃帽螭頭舫夾岸青煙
鵲尾爐老病逢春只思睡獨求僧榻寄須臾

翻香令

金爐猶暖麝煤殘惜香更把寶釵翻重聞處餘熏在
這一番氣味勝從前背人偷蓋小蓬山更將沈水
暗同然且圖得氤氳久爲情深嫌怕斷頭煙

虞美人琵琶

定場賀老今何在幾度新聲改新聲坐使舊聲闌俗
耳只知繁手不須彈斷弦試問誰能曉七歲文姬

小試教彈作鞞雷聲應有開元遺老淚縱橫

又送馬中玉○元刻述懷

歸心正似三春草試著萊衣小橘懷幾日向翁開懷
祖已嗔文度不歸來 禪心已斷人間愛只有平交

在笑論瓜葛一枰同看取靈光新賦有家風

又陳述古守杭已及瓜代未交前數日宴僚佐

於有美堂因請貳車蘇子瞻賦詞子瞻即席
而就寄攤破虞美人

湖山信是東南美一望須千里使君能得幾回來便
使尊前醉倒且徘徊 沙河塘裏燈初上水調誰家
唱夜闌風靜欲歸時惟有一江明月碧琉璃

又東坡與秦少游維揚飲別作此詞○或刻賀
方回或刻黃山谷或刻秦淮海或刻晏小山

波聲拍枕長淮曉隙月窺人小無清汴水自東流只
載一船離恨向西州 竹溪花浦曾同醉酒味多於
淚誰教風鑑在塵埃醞造一場煩惱送人來

又

落花已作風前舞又送黃昏雨曉來庭院半殘紅惟
有遊絲千丈裊晴空 殷勤花下重攜手更盡杯中
酒美人不用斂歌眉我亦多情無奈酒闌時

又

冰肌自是生來瘦那更分飛後日長簾幕望黃昏及至黃昏時候轉銷魂君還知道相思苦怎忍拋奴去不辭迢遞過關山只恐別郎容易見郎難

又

深深庭院清明過桃李初紅破柳絲搭在玉闌干簾外瀟瀟微雨做輕寒晚晴臺榭增明媚已拚花前醉更闌人靜月侵廊獨自行來行去好思量

又

持杯遙勸天邊月願月圓無缺持杯更復勸花枝且願花枝長在莫離披持杯月下花前醉休問榮枯事此歡能有幾人知對酒逢花不飲待何時

一斛珠

洛城春晚垂楊亂掩紅樓半小池輕浪紋如篆燭下花前曾醉離歌宴自惜風流雲雨散關山有限情無限待君重見尋芳伴爲說相思目斷西樓燕

醉落魄 席上呈元素○舊刻四首山谷老人云

醉醒醒醉非東坡作刪去

分攜如昨人生到處萍飄泊偶然相聚還離索多病多愁須信從來錯尊前一笑休辭卻天涯同是傷

淪落故山猶負平生約西望峨眉長羨歸飛鶴

又蘇州閶門留別○一刻山谷但故山歸計何

時決作故鄉歸路無因得

蒼頭華髮故山歸計何時決舊交新貴音書絕惟有

佳人猶作殷勤別離亭欲去歌聲咽瀟瀟細雨涼

吹頰淚珠不用羅巾裏彈在羅衣圖得見時說

又離京口作

輕雲微月二更酒醒船初發孤城回望蒼煙合公子

佳人不記歸時節巾偏扇墜藤牀滑覺來幽夢無

人說此生飄蕩何時歇家在西南常作東南別

臨江仙龍邱子自洛之蜀載二侍女戎裝駿馬

至溪山佳處輒留數日見者以為異人後十

年築室黃岡之北號曰靜菴居士作此贈之

細馬遠馱雙侍女青巾玉帶紅靴溪山好處便為家

誰知巴峽路卻見洛城花面旋落英飛玉蕊人間

春日初斜十年不見見紫雲車龍邱新洞府鉛鼎養丹

砂

又贈送

詩句揣來磨我鈍鈍錐不解生銛歡顏為我解冰霜

酒闌清夢覺春草滿池塘應念雪堂坡下老昔年

共採芸香功成名遂早還鄉
回車來過我喬木擁千章

又辛未離杭至潤別張弼秉道

我勸髯張歸去好從來自己忘
情塵心消盡道心平
江南與塞北何處不堪行
俎豆庚桑真過矣憑君
說與南榮願聞吳越報豐登
君王如有問結襪賴王生

又冬日卽事

自古相從休務日何妨
低唱微吟天垂雲重作春陰
坐中人半醉簾外雪將深
聞道分司狂御史紫雲
無路追尋淒風寒雨更駸駸
問囚長損氣見鶴總驚心

又送王緘

忘卻成都來十載因君未免思
量憑將清淚灑江陽
故山知好在孤客自悲涼
坐上別愁君未見歸來
欲斷無腸殷勤且更盡離觴
此身如傳舍何處是吾鄉

又夜到揚州席上作

尊酒何人懷李白草堂遙指江東珠
簾十里捲香風
花開花又謝離恨幾千重
輕舸渡江連夜到一時

驚笑衰容語音猶自帶吳儂夜闌相對處依舊夢魂

中

又 九十日春都過了貪忙何處追遊三分春色一分愁

雨翻榆莢陣風轉柳花球 閨苑先生須自責蟠桃

動是千秋不知人世苦厭求東皇不拘束肯為使君

留

又風水洞作

四大從來都徧滿此間風水何疑故應為我發新詩

幽花香澗谷寒藻舞淪漪 借與玉川生兩腋天仙

未必相思還憑流水送人歸層巔餘落日草露已沾

衣

又

一別都門三改火天涯踏盡紅塵依然一笑作春溫

無波真古井有節是秋筠 惆悵孤帆連夜發送行

淡月微雲尊前不用翠眉顰人生如逆旅我亦是行

人

又疾愈登望湖樓贈項長官

多病休文都瘦損不堪金帶垂腰望湖樓上暗香飄

和風春弄袖明月夜聞簫 酒醒夢回清漏永隱牀

無限更潮佳人不見董嬌嬈徘徊花上月空度可憐宵

又

夜飲東坡醒復醉歸來髣髴二三更家童鼻息已雷鳴
敲門都不應倚杖聽江聲長恨此身非我有何時
忘卻營營夜闌風靜縠紋平小舟從此逝江海寄餘
生

又

冬夜夜寒冰合井畫堂明月侵幃青缸明滅照悲啼
青缸挑欲盡粉淚裊還垂未盡一尊先掩淚歌聲
半帶清悲情聲兩盡莫相違欲知腸斷處梁上暗塵
飛

又贈王友道

誰道東陽都瘦損凝然點漆精神瑤林終自隔風塵
試看披鶴氅仍是謫仙人省可清言揮玉麈真須
保器全真風流何似道家純不應同蜀客惟愛卓文
君

又元刻不載

昨夜渡江何處宿望中疑是秦淮月明誰起笛中哀
多情王謝女相逐過江來雲雨未成還又散思量

好事難諧憑陵急槩兩相催想伊歸去後應似我情懷

蝶戀花 春景

花褪殘紅青杏子燕子飛時綠水人家繞枝上柳綿
吹又少天涯何處無芳草牆裏鞦韆牆外道牆外
行人牆裏佳人笑笑漸不聞聲漸悄多情卻被無情
惱飛一作來

又佳人

一顆櫻桃樊素口不愛黃金只愛人長久學畫鴉兒
猶未就眉尖已作傷春皺撲蝶西園隨伴走花落
花開漸解相思瘦破鏡重圓人在否章臺折盡青青
柳

又送春

雨過春容清更麗只有離人幽恨終難洗北固山前
三面水碧瓊梳擁青螺髻一紙鄉書來萬里問我
何年真箇成歸計白首送春拚一醉東風吹破千行
淚

又暮春別李公擇

簌簌無風花自譚寂寞園林柳老櫻桃過落日多情
還照座山青一點橫雲破路盡河回千轉枕繫纜

漁村月暗孤燈火憑仗飛魂招楚些我思君處君思我

又密州上元

燈火錢塘三五夜明月如霜照見人如畫帳底吹笙
香吐麝此般風味應無價寂寞山城人老也擊鼓
吹簫乍入農桑社火冷燈希霜露下昏昏雪意雲垂
野

又密州冬夜文安國席上作

簾外東風交雨霰簾裏佳人笑語如鶯燕深惜今年
正月暖燈光酒色搖金盞摻鼓漁陽搗未徧舞裊
瓊釵汗溼香羅軟今夜何人吟古怨清詩未就冰生
硯

又過漣水贈趙晦之

自古漣漪佳絕地繞郭荷花欲把吳興比倦客塵埃
何處洗真君堂下寒泉水左海門前酤酒市夜半
潮來月下孤舟起傾蓋相逢拚一醉雙鳧飛去人千
里

又述懷

雲水縈回溪上路疊疊青山環繞溪東注月白沙汀
翹宿鷺更無一點塵來處空溪叟相看私自語底事

區區苦要爲官去尊酒不空田百畝歸來分得閒中
趣

又離別

春事闌珊芳草歇客裏風光又過清明節小院黃昏
人憶別落紅處處聞啼鴉咫尺江山分楚越目斷
魂消應是音塵絕夢破五更心欲折角聲吹落梅花
月

又送潘大臨

別酒勸君君一醉清潤潘郎又是何郎壻記取釵頭
新利市莫將分付東鄰子回首長安佳麗地三十
年前我是風流帥爲向青樓尋舊事花枝缺處餘名
字

又同安生日放魚取金光明經救魚事

泛泛東風初破五江柳微黃萬萬千千縷佳氣鬱蔥
來繡戶當年江上生奇女一盞壽觴誰與舉二三箇
明珠膝上王文度放盡窮鱗看圍圍天公爲下曼陀
雨

又下五調俱元刻不載

記得畫屏初會遇好夢驚回望斷高唐路燕子雙飛
來又去紗窗幾度春光暮那日繡簾相見處低眼

佯行笑整香雲縷
斂盡春山羞
不語人前深意難輕
訴

又

昨夜秋風來萬里
月上屏幃冷透入衣袂
有客抱衾愁不寐
那堪玉漏長如歲
羈舍留連歸計未
夢斷魂銷一枕相思淚
衣帶漸寬無別意
新書報我添憔悴

又或刻晏同叔

玉枕冰寒消暑氣
碧簟紗廚向午朦朧
睡鶯舌惺惚如會意
無端畫扇驚飛起
雨後初涼生水際
人面桃花的的遙相似
眼看紅芳猶抱蕊
叢中已結新蓮子

又

雨霰疎疎經發火
巷陌鞦韆猶未清明
過杏子梢頭香蕾破
淡紅褪白胭脂宛
苦被多情相折挫
病緒厭厭渾似年時箇
繞徧迴廊還獨坐
月籠雲暗重門鎖

又

蝶懶鶯慵春過半
花落狂風小院殘
紅滿午醉未醒
紅日晚黃昏
簾幕無人捲
雲鬢鬢鬆眉黛淺
總是

愁媒欲訴誰消遣未信此情難繫絆楊花猶有東風
管

荷華媚 荷花

霞苞霓荷碧天然地別是風流標格重重青蓋下千
嬌照水好紅紅白白 每恨望明月清風夜甚低迷
不語妖邪無力終須放船兒去清香深處住看伊顏
色

漁家傲 金陵賞心亭送王勝之龍圖王守金陵

視事一日移南郡

千古龍蟠并虎踞從公一弔興亡處渺渺斜風吹細
雨芳草渡江南父老留公住 公駕飛車凌彩霧紅
鸞驂乘青鸞馭卻訝此洲名白鷺非吾侶翻然欲下
還飛去

又送台守江郎中

送客歸來燈火盡西樓淡月涼生暈明日潮來無定
準風未穩舟橫渡口重城近 江水似知孤客恨南
風爲解佳人愠莫學時流輕久困頻寄問錢塘江上
須忠信

又

皎皎牽牛河漢女盈盈臨水無由語望斷碧雲空日

暮無尋處夢回芳草生春浦
鳥散餘花紛似雨汀洲蘋老香風度
明月多情來照戶但攬取清光長送人歸去

又送張元唐省親秦州

一曲陽關情幾許知君欲向秦川去
白馬皂貂留不住回首處孤城不見天
霖霧到日長安花似雨故關楊柳初飛絮
漸見靴刀迎夾路誰得似風流膝上王文度

又贈曹光州

些小白鬚何用染幾人得見星星點
作郡浮光雖似箭君莫厭也應勝我三
年貶我欲自嗟還不敢向來三郡寧非
忝婚嫁事稀年冉冉知有漸千鈞重擔
從頭減

又元刻不載

臨水縱橫回晚靄歸來轉覺情懷動
梅笛煙中聞幾弄秋陰重西山雪淡雲凝凍
美酒一杯誰與共尊前舞雪狂歌送腰跨
金魚旌旆擁將何用祇堪妝點浮生夢

定風波十月九日孟亨之置酒秋香亭有拒霜

獨向君猷而開坐客喜笑以爲非使君莫可

當此花故作是詞

兩兩輕紅半暈腮依依獨爲使君回若道使君無此
意何爲雙花不向別人開但看低昂煙雨裏不已
勸君休訴十分杯更問尊前狂副使來歲花開時節
與誰來

又三月七日沙湖道中遇雨雨具先去同行皆

又狼狽余獨不覺已而遂晴故作此詞

莫聽穿林打葉聲何妨吟嘯且徐行竹杖芒屨輕勝
馬惟怕一蓑煙雨任平生料峭春風吹酒醒微冷
山頭斜照卻相迎回首向來蕭灑處歸去也無風雨
也無晴

又重陽括杜牧之詩

與客攜壺上翠微江涵秋影雁初飛塵世難逢開口
笑年少菊花須插滿頭歸醅酌但酬佳節了雲嶠
登臨不用怨斜暉古往今來誰不老多少牛山何必
更沾衣

又感舊

莫怪鴛鴦繡帶長腰輕不勝舞衣裳薄倖只貪遊冶
去向何處垂楊繫馬恣輕狂花謝絮飛春又盡堪恨
斷絃塵管伴啼妝不信歸來但自看怕見爲郎憔悴

卻羞郎

又送元素

千古風流阮步兵平生遊宦愛東平千里遠來還不
住歸去空留風韻照人清紅粉尊前深懊惱知道
怎生留得許多情記得明年花絮亂須看泛西湖是
斷腸聲

又元豐六年七月六日王文甫家飲釀白酒大

醉集古句作墨竹詞

雨洗涓涓嫩葉光風吹細細綠筠香秀色亂侵書帙
晚簾捲清陰微過酒尊涼人畫竹身肥擁腫何用
先生落筆勝蕭郎記得小軒岑寂夜廊下月和疎影
上東牆

又詠紅梅

好睡慵開莫厭遲自憐冰臉不時宜偶作小紅桃杏
色閒雅尚餘孤瘦雪霜姿休把閒心隨物態何事
酒生微暈沁瑤肌詩老不知梅格在吟詠更看綠葉
與青枝

又余昔與張子野劉孝叔李公擇陳令舉楊公

素會于吳興時子野作六客詞其卒章盡道
賢人聚吳分試問也應旁有老人星凡二十

五年再過吳興而五人者皆已亡矣時張仲謀與曹子方劉景文蘇伯固張秉道為坐客仲謀請作後六客詞

月滿茗溪照夜堂五星一老鬪光芒十五年閒真夢裏何事長庚對月獨淒涼
綠鬢蒼顏同一醉還是六人吟笑水雲鄉賓主談鋒誰得似看取曹劉今對兩蘇張

又王定國歌兒曰柔奴姓宇文氏眉目娟麗善應對家世住京師定國南遷歸余問柔廣南風土應是不好柔對曰此心安處便是吾鄉因為綴詞云

常羨人閒琢玉郎天教分付點酥娘自作清歌傳皓齒風起雪飛炎海變清涼
萬里歸來顏愈少微笑時時猶帶嶺梅香試問嶺南應不好卻道此心安處是吾鄉

十拍子暮秋

白酒新開九醞黃花已過重陽身外儻來都似夢醉裏無何即是鄉東坡日月長
玉粉旋烹茶乳金盞新擣橙香強染霜髭扶翠袖莫道狂夫不解狂狂夫老更狂

蘇幕遮 詠選仙圖

暑籠晴風解愠雨後餘清暗襲衣裾潤一局選仙逃
暑困笑指尊前誰向青霄近 整金盆輪玉筍鳳駕
鸞車誰敢爭先進重五休言升最緊縱有碧油到了
輸堂印

調笑令

漁父漁父江上微風細雨青蓑黃箬裳衣紅酒白魚
暮歸歸暮歸暮長笛一聲何處 歸雁歸雁飲啄江
南南岸將飛卻下盤旋塞外春來苦寒寒苦寒苦藻
荇欲生且住

行香子 密雲龍茶名極爲甘馨朱廖正一字明

略晚登蘇東坡之門公大奇之時黃秦晁張
號蘇門四學士東坡待之厚每來必令侍妾
朝雲取密雲龍家人以此知之一日又命取
密雲龍家人謂是四學士窺之乃廖明略也

綺席纔終歡意猶濃酒闌時高興無窮共誇君賜初
拆臣封看分香餅黃金縷密雲龍 鬪羸一水功敵
千鍾覺涼生兩腋清風暫留紅袖少卻紗籠放笙歌
散庭館靜略從容

又寓意

三入承明四至九卿問書生何辱何榮金張七葉紈
綺貂纓無汗馬事不獻賦不明經 成都卜肆寂寞
君平鄭子真巖谷躬耕寒灰炙手人重人輕除竺乾
學得無念得無名

又述懷

清夜無塵月色如銀酒斟時須滿十分浮名浮利休
苦勞神歎隙中駒石中火夢中身 雖抱文章開口
誰親且陶陶樂盡天真幾時歸去作箇閒人對一張
琴一壺酒一溪雲

又秋興

涼夜霜風先入梧桐渾無處回避衰容問公何事不
語書空但一回醉一回病一回慵 秋來庭下光陰
如箭似無言有意傷儂都將萬事付與千鍾任酒花
白眼花亂燭花紅

又冬思

攜手江村梅雪飄裾情何限處處銷魂故人不見舊
曲重聞向望湖樓孤山寺湧金門 尋常行處題詩
千首繡羅衫與拂紅塵別來相憶知是何人有湖中
月江邊柳隴頭雲

又過七里灘

一葉舟輕雙槳鴻驚水天清影湛波平魚翻藻鑑鷺
點煙汀過沙溪急霜溪冷月溪明 重重似畫曲曲
如屏算當年空老嚴陵君臣一夢今古虛名但遠山
長雲山亂曉山清

又與泗守過南山晚歸作

北望平川野水荒灣共尋春飛步屣顏 一作潺湲和
風弄袖香霧縈鬟正酒酣適人語笑白雲間 飛鴻
落照相將歸去澹娟娟玉宇清閒何人無事晏坐空
山望長橋上燈火亂使君還

青玉案 和賀方回韻送伯固歸吳中故居

三年枕上吳中路遣黃耳隨君去若到松江呼小渡
莫驚鷗鷺鷺四橋盡是老子經行處 鞦韆圖上看春
暮常記高人右丞句作箇歸期天已許春衫猶是小
蠻針線曾溼西湖雨

婦人嬌 王都尉席上贈侍人

滿院桃花盡是劉郎未見於中更一枝纖軟仙家日
月笑人閒春晚濃睡起驚飛亂紅千片 密意難窺
羞容易見平白地爲伊腸斷問君終日怎安排心眼
須信道司空自來見慣

又贈朝雲

白髮蒼顏正是維摩境界空方丈散花何礙朱脣筋
點更髻鬟生采這些箇千生萬生只在好事心腸
著人情態閒窗下斂雲凝黛明朝端午學紉蘭爲佩
尋一首好詩要書裙帶

又戲邦直

別駕來時滿城燈火無數向青鎖隙中偷覷元來便
是共綵鸞仙侶方見了管須低聲說與百子流蘇
千枝寶炬人間有洞房煙霧春來何事故拋人別處
坐望斷樓中遠山歸路

江城子陶淵明以正月五日遊斜川臨流班坐

顧瞻南阜愛會城之獨秀乃作斜川詩至今
使人想見其處元豐壬戌之春余躬耕於東
坡築雪堂居之南挹四望亭之後邱西控北
山之微泉慨然而歎此亦斜川之遊也乃作
長短句以江城子歌之○舊刻十四首攷南
來飛燕北歸鴻是秦淮海作刪

夢中了了醉中醒只淵明是前生走徧人閒依舊卻
躬耕昨夜東坡春雨足烏鵲喜報新晴雪堂西畔
暗泉鳴北山傾小溪橫南望亭邱孤秀聳會城都是
斜川當日境吾老矣寄餘齡

又述古去餘杭爲去思者作○元刻孤竹閣送

述古

翠蛾羞黛怯人看掩霜紈淚偷彈且盡一尊收淚唱
陽關漫道帝城天樣遠天易見見君難 畫堂新構
近孤山曲闌干爲誰安飛絮落花春色屬明年欲棹
小舟尋舊事無處問水連天

又湖上與張先同賦○元刻江景

鳳凰山下雨初晴水風清晚霞明一朶芙蓉開過尚
盈盈何處飛來雙白鷺如有意慕娉婷 忽聞江上
弄哀箏苦含情遣誰聽煙斂雲收依約是湘靈欲待
曲終尋問取人不見數峯青

又獵詞

老夫聊發少年狂左牽黃右擎蒼錦帽貂裘千騎卷
平岡爲報傾城隨太守親射虎看孫郎 酒酣胸膽
尚開張鬢微霜又何妨持節雲中何日遣馮唐會挽
雕弓如滿月西北望射天狼

又恨別

天涯流落思無窮旣相逢卻匆匆攜手佳人和淚折
殘紅爲問東風餘幾許春縱在與誰同 隋堤三月
水溶溶背歸鴻去吳中回望彭城清泗與淮通寄我

相思千點淚流不到楚江東

又冬景

相逢不覺又初寒對尊前惜流年風緊離亭冰結淚
珠圓雪意留君君且住從此去少清歡 轉頭山下
轉頭看路漫漫玉花翻銀海光寬何處是超然知道
故人相念否攜翠袖倚朱闌

又大雪有懷朱康叔使君亦知使君之念我也

作江神子以寄之

黃昏猶是雨纖纖曉開簾欲平簷江闊天低無處認
青帘孤坐凍吟誰伴我揩病目撚衰髯 使君留客
醉厭厭水晶鹽爲誰甜手把梅花東望憶陶潛雪似
故人人似雪雖可愛有人嫌

又陳直方妾鬻錢塘人也丐新詞爲作此錢塘

人好唱陌上花緩緩曲余嘗作數絕以紀其

事矣

玉人家在鳳凰山水雲間掩門閒門外行人立馬看
弓彎十里春風誰指似斜日映繡簾斑 多情好事
與君還憫新鰥拭餘潛明月空江香霧著雲鬟陌上
花開看盡也聞舊曲破朱顏

又

十年生死兩茫茫，不思量，自難忘。千里孤墳，無處話
淒涼。縱使相逢應不識，塵滿面，鬢如霜。夜來幽夢
忽還鄉。小軒窗，正梳妝。相顧無言，惟有淚千行。料得
年年腸斷處，明月夜，短松岡。

又或刻葉夢得或刻張元幹

銀濤無際捲蓬瀛，落霞明，暮雲平。曾見青鸞紫鳳下
層城。二十五絃彈不盡，空感慨，惜離情。蒼梧烟水
斷歸程。捲霓旌，爲誰迎。空有千行流淚，寄幽貞。舞罷
魚龍雲海晚，千古恨，入江聲。

又

前瞻馬耳九仙山，碧連天。晚雲閒。城上高臺，真箇是
超然。莫使匆匆雲雨散，今夜裏，月嬋娟。小溪鷗鷺
靜聯拳。去翩翩。點輕烟。人事淒涼，回首便他年。莫忘
使君歌笑處，垂柳下，矮槐前。

又

墨雲拖雨過西樓，水東流。晚烟收。柳外殘陽，回照動
簾鉤。今夜巫山真箇好，花未落，酒新芻。美人微笑
轉星眸。月華羞，捧金甌。歌扇縈風，吹散一春愁。試問
江南諸伴侶，誰似我，醉揚州。

又元刻不載

膩紅勻臉襯檀脣晚妝新暗傷春手撚花枝誰會兩
眉顰連理帶頭雙□□留待與箇中人淡烟籠月
繡簾陰畫堂深夜沈沈誰道□□繫得人心一自
綠窗偷見後便惟悴到如今

千秋歲 湖州暫來徐州重陽作

淺霜侵綠髮少仍新沐冠直縫巾橫幅美人憐我老
玉手簪黃菊秋露重真珠落袖沾餘馥座上人如
玉花映花奴肉蜂蝶亂飛相逐明年人縱健此會應
難復須細看晚來月上和銀燭

河滿子 湖州作

見說岷峨悽愴旋聞江漢澄清但覺秋來歸夢好西
南自有長城東府三人最少西山入國初平莫負
花溪縱賞何妨藥市微行試問當壚人在否空教是
處聞名唱著子淵新曲應須分外含情

祝英臺近 惜別

挂輕帆飛急槳還過釣臺路酒病無聊欹枕聽鳴櫓
斷腸簇簇雲山重重烟樹回首望孤城何處閱離
阻誰念縈損襄王何曾夢雲雨舊恨前歡心事兩無
據要知欲見無由癡心猶自倩人道一聲傳語

一叢花

今年春淺臘侵年冰雪破春妍東風有信無人見露
微意柳際花邊寒夜縱長孤衾易暖鐘鼓漸清圓
朝來初日半含山樓閣淡疎烟遊人便作尋芳計小
桃杏應已爭先衰病少情疎慵自放惟愛日高眠

皂羅特髻 采菱拾翠

采菱拾翠算似此佳名阿誰消得采菱拾翠稱使君
知客千金買采菱拾翠更羅裙滿把真珠結采菱拾
翠正髻鬟初合 真箇采菱拾翠但深憐輕拍一雙
手采菱拾翠繡衾下抱著俱香滑采菱拾翠待到京
尋覓

洞仙歌 詠柳

江南臘盡早梅花開後分付新春與垂柳細腰肢自
有人格風流仍更是骨體清英雅秀 永豐坊那畔
盡日無人惟見金絲弄晴晝斷腸是飛絮時綠葉成
陰無箇事一成消瘦又莫是東風逐君來便吹散眉
間一點春皺

又僕七歲時見眉山老尼姓朱忘其名年九十

餘自言嘗隨其師入蜀主孟昶宮中一日大
熱蜀主與花蕊夫人夜起避暑摩訶池上作
一詞朱具能記之今四十年朱已死矣人無

知此詞者獨記其首兩句暇日尋味豈洞仙
歌令乎乃為足之

冰肌玉骨自清涼無汗水殿風來暗香滿繡簾開一
點明月窺人人未寢欹枕釵橫鬢亂
起來攜素手
庭戶無聲時見疎星渡河漢試問夜如何夜已是三
更金波淡玉繩低轉但屈指西風幾時來又不道流
年暗中偷換

勸金船

和元素韻自撰腔命名

無情流水多情客勸我如曾識杯行到手休辭卻這
公道難得曲水池上小字更書年月如對茂林脩竹
似永和節
纖纖素手如霜雪笑把秋花插尊前莫
怪歌聲咽又還是輕別此去翱翔徧賞玉堂金闕欲
問再來何歲應有華髮

意難忘妓館元刻不載

花擁鴛鴦房記馳肩髻小約鬢眉長輕身翻燕舞低語
轉鶯簧相見處便難忘肯親度瑤觴向夜闌歌翻郢
曲帶換韓香
別來音信難將似雲收楚峽雨散巫
陽相逢情有在不語意難量此箇事斷人腸怎禁得
恹惶待與伊移根換葉試又何妨

滿江紅董義夫名鉞自侔漕得罪歸鄱陽遇東

坡於齊安怪其豐暇自得曰吾再娶柳氏三
日而去官吾固不戚戚而憂柳氏不能忘懷
於進退也已而欣然同憂患如處富貴吾是
以益安焉乃令家僮歌其所作滿江紅東坡
嗟歎之次其韻

憂喜相尋風雨過一江春綠巫峽夢至今空有亂山
屏簇何似伯鸞攜德耀簞瓢未足清歡足漸燦然光
彩照階庭生蘭玉 幽夢裏傳心曲腸斷處憑他續
文君婿知否笑君卑辱君不見周南歌漢廣天教夫
子休喬木便相將左手抱琴書雲閒宿

又寄鄂州朱使君

江漢西來高樓下蒲萄深碧猶自帶岷峨雲浪錦江
春色君是南山遺愛守我爲劍外思歸客對此閒風
物豈無情殷勤說 江表傳君休讀狂處士真堪惜
空洲對鸚鵡葦花蕭瑟獨笑書生爭底事曹公黃祖
俱飄忽願使君還賦謫仙詩追黃鶴

又東武會流杯亭

東武南城新隄固連漪初溢隱隱徧長林高阜臥紅
堆碧枝上殘花吹盡也與君更向江頭覓問向前猶
有幾多春三之一 官裏事何時畢風雨外無多日

相將泛曲水滿城爭出君不見蘭亭脩禊事當時座上皆豪逸到如今脩竹滿山陰空陳迹

又懷子由作

清潁東流愁目斷孤帆明滅宦遊處青山白浪萬重千疊辜負當年林下意對牀夜雨聽蕭瑟恨此生長向別離中添華髮一尊酒黃河側無限事從頭說相看恍如昨許多年月衣上舊痕餘苦淚眉間喜氣添黃色便與君池上覓殘春花如雪

又正月十三日送姜安國還朝

天豈無情天也解多情留客春向暖朝來底事尚飄輕雪君過春來紆組綬我應歸去躑躅泉石恐異時杯酒忽相思雲山隔浮世事俱難必人縱健頭應白何辭更一醉此歡難覓欲向佳人訴離恨淚珠先已凝雙睫但莫追新燕卻來時音書絕

滿庭芳元豐七年四月一日余將自黃移汝留

別雪堂鄰里二三君子會李仲覽自江東來別遂書以遺之○舊刻七首攷北苑龍團是

淮海作刪

歸去來兮吾歸何處萬里家在岷峨百年強半來日苦無多坐見黃州載閨兒童盡楚語吳歌山中友雞

豚社飲相勸老東坡 云何當遠去人生底事來往
如梭待閒看秋風洛水清波好在堂前細柳應念我
莫翦柔柯仍傳語江南父老時與啜漁蓑

又余居黃五年將赴臨汝作滿庭芳一篇以別

黃人既至南都蒙恩放歸陽羨復作一篇

歸去來兮清溪無底上有千仞嵯峨畫橋西畔天遠
夕陽多老去君恩未報空回首彈鋏悲歌船頭轉長
風萬壘歸馬駐平坡 無何何處是銀潢盡處天女
停梭問人閒何事久戲風波顧問同來穉子應爛汝
腰下長柯青衫破羣仙笑我千縷挂烟蓑

又佳人

香鬢雕盤寒生冰筋畫堂別是風光主人情重開宴
出紅妝膩玉圓搓索頸藕絲嫩新織仙裳雙歌罷虛
欄轉月餘韻尚悠颺 人間何處有司空見慣應謂
尋常坐中有狂客惱亂愁腸報道金釵墜也十指露
春筍纖長親曾見全勝宋玉想像賦高唐

又或注警悟

蝸角虛名蠅頭微利算來著甚乾忙事皆前定誰弱
又誰強且趁閒身未老儘放我些子疎狂百年裏渾
教是醉三萬六千場 思量能幾許憂愁風雨一半

相妨又何須抵死說短論長幸對清風皓月苔茵展
雲幕高張江南好千鍾美酒一曲滿庭芳

又有王長官者棄官三十三年黃人謂之王先

生因送陳慥來過余因賦

三十三年今誰存者算只君與長江凜然蒼檜霜幹
苦難雙聞道司州古縣雲溪上竹塢松窗江南岸不
因送子寧肯過吾邦 縱縱疎雨過風林舞破煙蓋
雲幢願持此邀君一飲空缸居士先生老矣真夢裏
相對殘缸歌舞斷行人未起船鼓已逢逢

又余年十七始與劉仲達往來于眉山今年四
十九相逢于泗上洛水淺凍久留郡中晦日

同遊南山話舊感歎因作此詞

三十三年漂流江海萬里煙浪雲帆故人驚怪憔悴
老青衫我自疎狂異趣君何事奔走塵凡流年盡窮
途坐守船尾凍相銜 巉巖淮浦外層樓翠壁古寺
空巖步攜手林閒笑挽纖纖莫上孤峯盡處縈望眼
雲水相攬家何在因君問我歸步繞松杉

水調歌頭快哉亭作

落日繡簾捲亭下水連空知君為我新作窗戶溼青
紅長記平山堂上欹枕江南烟雨杳杳沒孤鴻認得

醉翁語山色有無中
浪起掀舞一葉白頭翁
堪笑蘭臺公子未解莊生天籟
籟剛道有雌雄一點浩然氣
千里快哉風

又余去歲在東武作水調歌頭以寄子由今年
子由相從彭城百餘日過中秋而去作曲以
別余以其語過悲乃爲和之其意以不早退
爲戒以退而相從之樂爲慰云耳

安石在東海從事鬢驚秋中年親友難別
絲竹緩離愁一日功成名遂準擬東還
海道扶病入西州雅志因軒冕遺恨寄
滄洲歲二云暮須早計要褐裘故鄉歸
去千里佳處輒遲留我醉歌時君和醉
倒須君扶我惟酒可忘憂一任劉玄德
相對臥高樓

又丙辰中秋歡飲達旦大醉作此篇兼懷子由
明月幾時有把酒問青天不知天上宮闕
今夕是何年我欲乘風歸去又恐瓊樓玉
宇高處不勝寒起舞弄清影何似在人間
轉朱閣低綺戶照無眠不應有恨何事
長向別時圓人有悲歡離合月有陰晴
圓缺此事古難全但願人長久千里共
嬋娟

又歐陽文忠公嘗問余琴詩何者最善
答以退之穎師琴詩最善公曰此詩最
奇麗然非聽

琴乃聽琵琶也余深然之建安章質夫家善琵琶者乞為歌詞余久不作特取退之詞稍

加櫟括使就聲律以遺之

昵昵兒女語燈火夜微明恩冤爾汝來去彈指淚和聲忽變軒昂勇士一鼓填然作氣千里不留行回首暮雲遠飛絮攪青冥衆禽裏真彩鳳獨不鳴躋攀寸步千險一落百尋輕煩子指間風雨置我腸中冰炭起坐不能平推手從君去無淚與君傾

又子由徐州中秋作

離別一何久七度過中秋去年東武今夕明月不勝愁豈意彭城山下同泛清河古汴船上載涼州鼓吹助清賞鴻雁起汀洲坐中客翠羽被紫綺裘素娥無賴西去曾不為人留今夜清尊對客明夜孤帆水驛依舊照離憂但恐同王粲相對永登樓

雨中花慢初至密州以旱蝗齋素者累月方春

牡丹盛開不獲一賞至九月忽開千葉一朵

雨中為置酒作

今歲花時深院盡日東風蕩漾茶烟但有綠苔芳草柳絮榆錢聞道城西長廊古寺甲第名園有國豔帶酒天香染袂為我留連清明過了殘紅無處對此

淚灑尊前秋向晚一枝何事向我依然高會聊追短
景清商不假餘妍不如留取十分春態付與明年

又元刻逸

邃院重簾何處惹得多情愁對風光睡起酒闌花謝
蝶亂蜂忙今夜何人吹笙北嶺待月西廂空悵望處
一株紅杏斜倚低牆羞顏易變傍人先覺到處被
著猜防誰信道些兒恩愛無限淒涼好事若無閒阻
幽歡卻是尋常一般滋味就中香美除是偷嘗

又元刻逸

嫩臉羞蛾因甚化作行雲卻返巫陽但有寒燈孤枕
皓月空牀長記當初乍諧雲雨便學鸞凰又豈料正
好三春桃李一夜風霜丹青畫無言無笑看了慢
結愁腸襟袖上猶存殘黛漸減餘香一自醉中忘了
奈何酒後思量算應負你枕前珠淚萬點千行

八聲甘州 寄參寥子

有情風萬里卷潮來無情送潮歸問錢塘江上西興
浦口幾度斜暉不用思量今古俯仰昔人非誰似東
坡老白首忘機記取西湖西畔正暮山好處空翠
烟霏算詩人相得如我與君稀約他年東還海道願
謝公雅志莫相違西州路不應回首爲我沾衣

醉蓬萊重九上君猷

笑勞生一夢羈旅三年又還重九華髮蕭蕭對荒園
搔首賴有多情好飲無事似古人賢守歲歲登高年
年落帽物華依舊此會應須爛醉仍把紫菊茱萸
細看重重嗅搖落霜風有手栽雙柳來歲今朝爲我西
顧醉羽觴江口會與州人飲公遺愛一江醇酎

三部樂 情景

美人如月乍見掩暮雲更增妍絕算應無恨安用陰
晴圓缺嬌甚空只成愁待下牀又嬾未語先咽數日
不來落盡一庭紅葉今朝置酒強起問爲誰減動
一分香雪何事散花却病維摩無疾却低眉慘然不
答唱金縷一聲怨切堪折便折且惜取少年花發

念奴嬌 赤壁懷古

大江東去浪淘盡千古風流人物故壘西邊人道是
三國周郎赤壁亂石穿空驚濤拍岸捲起千堆雪江
山如畫一時多少豪傑遙想公瑾當年小喬初嫁
了雄姿英發羽扇綸巾談笑間強虜灰飛烟滅故國
神遊多情應笑我早生華髮人間如夢一尊還酹江
月

又中秋

憑高眺遠見長空萬里雲無留迹桂魄飛來光射處
冷浸一天秋碧玉宇瓊樓乘鸞來去人在清涼國江
山如畫望中烟樹歷歷我醉拍手狂歌舉杯邀月
對影成三客起舞徘徊風露下今夕不知何夕便欲
乘風翻然歸去何用騎鵬翼水晶宮裏一聲吹斷橫
笛

水龍吟 昔謝自然欲過海求師蓬萊至海中或
謂自然蓬萊隔弱水三十萬里不可到天台
有司馬子微身居赤域名在絳闕可往從之
自然乃還受道于子微白曰仙去子微著坐
忘論七篇樞一篇年百餘將終謂弟子曰吾
居玉霄峯東望蓬萊嘗有真靈降焉今爲東
海青童君所召乃蟬脫而去其後李太白作
大鵬賦云嘗見子微于江陵謂余有仙風道
骨可與神遊八極之表元豐七年冬子過臨
淮而湛然先生梁公在焉童顏清徹如二二三
十許人然人亦有自少見之者善吹鐵笛嘹
然有穿雲裂石之聲乃作水龍吟一首記子
微太白之事倚其聲而歌之

古來雲海茫茫蓬山絳闕知何處人間自有赤城居

一珍做宋版印
士龍蟠鳳舉清淨無爲坐忘遺照入篇奇語向玉霄
東望蓬萊晝靄有雲駕驂風馭行盡九州四海笑
紛紛落花飛絮臨江一見謫仙風采無言心許入表
神遊浩然相對酒酣箕踞待垂天賦就騎鯨路穩約
相將去

又嶺南太守閻邱公顯致仕居姑蘇東坡每過
必留連嘗言過姑蘇不遊虎邱不謁閻邱乃
二欠事其重之如此一日出其後房佐酒有
懿卿者甚有才色善吹笛因作水龍吟贈之

○一云贈趙晦之吹笛侍兒

楚山脩竹如雲異材秀出千林表龍鬚半翦鳳膺微
漲玉肌勻繞木落淮南雨晴雲夢月明風裊自中郎
不見桓伊去後知辜負秋多少聞道嶺南太守後
堂深綠珠嬌小綺窗學弄梁州初徧霓裳未了嚼徵
含宮泛商流羽一聲雲杪爲使君洗盡蠻風瘴雨作
霜天曉

又次韻章質夫楊花詞

似花還似非花也無人惜從教墜拋街傍路思量却
是無情有思縈損柔腸困酣嬌眼欲開還閉夢隨風
萬里尋郎去處又還被鶯呼起不恨此花飛盡恨

西園落紅難綴曉來雨過遺蹤何在
一池萍碎春色三分二分塵土一分
流水細看來不是楊花點點是離人淚

又閻邱大夫孝直公顯嘗守黃州作樓霞樓爲郡中勝絕元豐五年予謫居於黃正月十七日夢扁舟渡江中流回望樓中歌樂雜作舟中人言公顯方會客也覺而異之乃作此詞公顯時已致仕在蘇州

小舟橫截春江臥看翠壁紅樓起雲間笑語使君高會佳人半醉危柱哀絃豔歌餘響繞雲縈水念故人老大風流未減獨回首烟波裏推枕惘然不見但空江月明千里五湖聞道扁舟歸去仍攜西子雲夢南州武昌南岸昔遊應記料多情夢裏端來見我也參差是

又元刻不載

小溝東接長江柳隄葦岸連雲際烟村瀟灑人閒一鬪漁樵早市永晝端居寸陰虛度了成何事但絲尊玉藕珠杭錦鯉相留戀又經歲因念浮邱舊侶慣瑤池羽觴沈醉青鸞歌舞銖衣搖曳壺中天地飄墮人間步虛聲斷露寒風細抱素琴獨向銀蟾影裏此

懷難寄

又詠雁○元刻不載

露寒烟冷蒹葭老天外征鴻寥唳銀河秋晚長門燈
悄一聲初至應念瀟湘岸遙人靜水多菰米望極平
田徘徊欲下依前被風驚起須信衡陽萬里有誰
家錦書遙寄萬里雲外斜行橫陣纔疎又綴仙掌月
明石頭城下影搖寒水念征衣未搗佳人拂杵有盈
盈淚

歸朝歡舊刻歸朝歌○公嘗有詩與蘇伯固其

序曰昔有九江與蘇伯固唱和其略曰我夢

扁舟浮震澤雪浪橫江千頃白覺來滿眼是

廬山倚天無數開青壁蓋實夢也然公詩復

云扁舟震澤定何時滿眼廬山覺又非

我夢扁舟浮震澤雪浪搖空千頃白覺來滿眼是廬
山倚天無數開青壁此生長接浙與君同是江南客
夢中遊覺來清賞同作飛梭擲明日西風還挂席
唱我新詞淚沾臆靈均去後楚山空澧陽蘭芷無顏
色君才如夢得武陵更在西南極竹枝詞莫搖新唱
誰謂古今隔

永遇樂寄孫巨源

長憶別時景疎樓下明月如水美酒清歌留連不住
月隨人千里別來三度孤光又滿冷落共誰同醉捲
珠簾淒然顧影共伊到明無寐 今朝有客來從淮
上能道使君深意憑仗清淮分明到海中有相思淚
而今何在西垣清禁夜永雲華侵被此時看迴廊曉
月也應暗記

又夜宿燕子樓夢盼盼因作此詞○一云徐州

夢覺北登燕子樓作

明月如霜好風如水清景無限曲港跳魚圓荷瀉露
寂寞無人見沈沈三鼓飄然一葉黯黯夢雲驚斷夜
茫茫重尋無覓處覺來小園行徧 天涯倦客山中
歸路望斷故園心眼燕子樓空佳人何在空鎖樓中
燕古今如夢何曾夢覺但有舊歡新怨異時對南樓
夜景爲余浩歎

又眺望○時刻不載

天末山橫半空簫鼓樓觀高起指點裁成東風滿院
總是新桃李綸巾羽扇一尊飲罷日送斷鴻千里攬
清歌餘音不斷縹緲尚縈流水 年來自笑無情何
事猶有多情遺思綠鬢朱顏匆匆拚了却記花前醉
明年春到重尋幽夢應在亂鶯聲裏拍闌干斜陽轉

處有誰共倚

無愁可解國士范日新作越調解愁維陽劉九

伯壽聞而悅之戲作俚語之詩天下傳詠以

謂幾於達者龍邱子猶笑之此雖免乎愁猶

天末山有所解也者夫遊於自然而託於不得已入

又樂亦樂人愁亦愁彼且惡乎解哉乃反其詞

作無愁可解

光景百年看便一世生來不識愁味問愁何處來更
開解箇甚底萬事從來風過耳何用不著心裏你喚
做展却眉便是達者也則恐未此理本不通言何
曾道歡遊勝如名利道則渾是錯不道如何卽是這
裏元無我與你甚喚做物情之外若須待醉了方開
解時問無酒怎生醉

沁園春

孤館燈青野店雞號旅枕夢殘漸月華收練晨霜耿
耿雲山摘錦朝露漙漙世路無窮勞生有限似此區
區長鮮歡微吟罷凭征鞍無語往事千端當時共
客長安似二陸初來俱少年有筆頭千字胸中萬卷
致君堯舜此事何難用舍由時行藏在我袖手何妨
閒處看身長健但優游卒歲且鬪尊前

賀新郎余倅杭日府僚湖中高會羣妓畢集惟
秀蘭不來營將督之再三乃來僕問其故答
曰沐浴倦臥忽有扣門聲急起詢之乃營將
催督也整妝趨命不覺稍遲時府僚有屬意
於蘭者見其不來恚恨不已云必有私事秀
蘭含淚力辯而僕亦從旁冷語陰爲之解府
僚終不釋然也適榴花開盛秀蘭以一枝藉
手獻座中府僚愈怒責其不恭秀蘭進退無
據但低首垂淚而已僕乃作一曲名賀新涼
令秀蘭歌以侑觴聲容妙絕府僚大悅劇飲
而罷

乳燕飛華屋悄無人桐陰轉午晚涼新浴手弄生綃
白團扇扇手一時似玉漸困倚孤眠清熟簾外誰來
推繡戶枉教人夢斷瑤臺曲又却是風敲竹石榴
半吐紅巾蹙待浮花浪蕊都盡伴君幽獨穠豔一枝
細看取芳心千重似束又恐被秋風驚綠若待得君
來向此花前對酒不忍觸共粉淚兩蔌蔌

稍徧陶淵明賦歸去來有其詞而無其聲余治

東坡築雪堂于上人皆笑其陋獨鄱陽董毅
夫過而悅之有卜鄰之意乃取歸去來詞稍

加槩括使就聲律以遺毅夫使家僮歌之時
相從于東坡釋耒而和之扣牛角而爲之節
不亦樂乎

爲米折腰因酒棄家口體交相累歸去來誰不遣君
歸覺從前皆非今是露未晞征夫指予歸路門前笑
語喧童稚嗟舊菊都荒新松暗老吾年今已如此但
小窗容膝閉柴扉策杖看孤雲暮鴻飛雲出無心鳥
倦知還本非有意噫歸去來兮我今忘我兼忘世
親戚無浪語琴書中有真味步翠麓崎嶇泛溪窈窕
涓涓暗谷流春水觀草木欣榮幽人自感吾生行且
休矣念寓形宇內復幾時不自覺皇皇欲何之委吾
心去留誰計神仙知在何處富貴非吾願但知臨水
登山嘯詠自引壺觴自醉此生天命更何疑且乘流
遇坎還止其詞蓋世所謂般瞻之稍徧也般瞻龜茲
語也華言爲五聲蓋羽聲也於五音之次爲第五今
世作般涉誤矣稍徧三疊每疊加促字當爲稍讀去
聲世作哨或作涉皆非是

又春詞

睡起畫堂銀蒜押簾珠幕雲垂地初雨歇洗出碧羅
天正溶溶養花天氣一霎暖風迴芳草榮光浮動捲

皺銀塘水方杏靨勺酥花鬢吐繡園林翠紅排比見
乳燕捎蝶過繁枝忽一綫爐香逐遊絲晝永人閒獨
立斜陽晚來情味便乘興攜將佳麗深入芳菲裏
撥胡琴語輕攏慢撚總伶俐看緊約羅裙急趣檀板
霓裳入破驚鴻起顰月臨眉醉霞橫險歌聲悠揚雲
際任滿頭紅雨落花飛墜漸鳩鵲樓西玉蟾低尚徘徊
未盡歡意君看今古悠悠浮幻人間世這些三百歲
光陰幾日三萬六千而已醉鄉路穩不妨行但人生
要適情耳

戚氏 此詞詳敘穆天子西王母事世不知所謂

遂謂非東坡作李端叔跋云東坡在山中燕
席闕有歌戚氏調者坐客言調美而詞不典
以請于公公方觀山海經卽敘其事爲題使
妓再歌之隨其聲填寫歌竟篇就纔點定五
六字而已

玉龜山東皇靈媿統羣仙絳闕峇嶢翠房深迥倚霏
烟幽閒志蕭然金城千里鎖嬋娟當時穆滿巡狩翠
華曾到海西邊風露明霽鯨波極目勢浮輿蓋方圓
正迢迢麗日玄圃清寂瓊草芊綿爭解繡勒香鞵
鸞輅駐蹕八馬戲芝田瑤池近畫樓隱隱翠鳥翩翩

肆華筵。間作管鳴絃。宛若帝所鈞天稚頭皓齒綠
髮方瞳圓極恬淡高妍。盡倒瓊壺酒獻金鼎藥固
大椿年。縹緲飛瓊妙舞命雙成奏曲醉留連雲璈韻
響瀉寒泉浩歌暢飲斜月低河漢漸漸倚霞天際紅
深淺動歸思迴。今塵寰爛熳遊玉輦東還杏花風數
里響鳴鞭望長安路依稀柳色翠點春妍。

東坡詞

東坡詞
如天此國我無事天子西王世事豈不吹海關
要斷前耳

水劍幾日三萬六千而日月相照
所未盡增意吾香今古悠悠我
詞曰滿面臨風雨容容外深
言莫人矣
立於
下
...

東坡詩文不啻千億刻獨長短句罕見近有金陵本
子人爭喜其詳備多渾入歐黃秦柳作今悉刪去至
其詞品之工拙則魯直文潛端叔輩自有定評古虞
毛晉記

三言

其詞品入古出今
其言直文
其意自
其氣
其神
其骨
其血
其肉
其髓
其精
其神
其骨
其血
其肉
其髓
其精



山谷詞

山谷目錄

沁園春 一調

惜餘歡 一調

水龍吟 一調

看花迴 一調

念奴嬌 一調

晝夜樂 一調

逍遙樂 一調

雨中花慢 一調

醉蓬萊 二調

滿庭芳 五調

水調歌頭 二調

促拍滿路花 一調

洞仙歌 一調

驀山溪 四調

望遠行 一調

憶帝京 三調

撼庭行 一調

下水船 一調

歸田樂引 二調

離亭燕 一調

千秋歲 二調

江城子 二調

兩同心 三調

少年心 二調

青玉案 二調

喝火令 一調

品令 二調

漁家傲 五調

醜奴兒 二調

定風波 八調

河傳 一調

撥棹子 一調

蝶戀花 一調

步蟾宮 二調

踏莎行 二調

醉落魄 四調

玉樓春十一調 虞美人二調

南鄉子六調 鵲橋仙二調

鷓鴣天八調 鼓笛令四調

浪淘沙一調 留春令一調

南歌子四調 望江東一調

一落索一調 西江月五調

桃源憶故人一調 畫堂春二調

賀聖朝一調 阮郎歸七調

更漏子二調 清平樂六調

好事近三調 謁金門一調

好女兒三調 減字木蘭花十三調

訴衷情三調 採桑子八調

歸田樂令一調 卜算子一調

菩薩蠻二調 雪花飛一調

浣溪沙三調 點絳脣三調

調笑令一調 并詩 宴桃源一調

山谷詞目録

山谷詞

宋 黃庭堅

沁園春

把我身心爲伊煩惱，算天便知恨。一回相見，百方做計，未能偎倚。早覓東西鏡裏，拈花水中捉月，覷著無由得近。伊添憔悴，鎮花銷翠減，玉瘦香肌。奴兒又有行期，你去卽無妨我，共誰向眼前常見。心猶未足，怎生禁得真箇分離。地角天涯，我隨君去，掘井爲盟。無改移，君須是做些兒相度，莫待臨時。

惜餘歡 茶詞

四時美景，正年少賞心，頻啟東閣芳酒。載盈車喜朋侶，簪合杯觴，交飛勸酬。獻正酣飲，醉主公陳榻，坐來爭奈。玉山未頽，興尋巫峽。歌闌旋燒絳蠟，況漏轉銅壺，煙斷香鴨。猶整醉中花，借纖手重插，相將扶上。金鞍驟裏，碾春焙，願少延歡洽。未須歸去，重尋豔歌，更留時霎。

水龍吟 黔守曹伯達供備生日

早秋明月，新圓漢家戚里，生飛將青驄寶勒。綠沈金鎖，曾隨天仗，種德江南。宣威西夏，合宮陪享，況當年定計。昭陵與子，勳勞在諸公上。千騎風流，年少暫

淹留莫孤清賞平坡駐馬虛弦落雁思臨虜帳徧舞
摩圍遞歌彭水拂雲驚浪看朱顏綠鬢封侯萬里寫
凌煙像

看花迴 茶詞

夜永蘭堂醺飲半倚頽玉爛熳墜鈿墮履是醉時風
景花暗燭殘歡意未闌舞燕歌珠成斷續催茗飲旋
煑寒泉露井瓶竇響飛瀑 纖指緩連環動觸漸泛
起滿甌銀粟香引春風在手似粵嶺閩溪初采盈掬
暗想當時探春連雲尋篁竹怎歸得鬢將老付與杯
中綠

念奴嬌 八月十八日同諸生步自永安城樓過

張寬夫園待月偶有名酒因以金荷酌衆客
客有孫彥立善吹笛援筆作樂府長短句文
不加點

斷虹霽雨淨秋空山染脩眉新綠桂影扶疎誰便道
今夕清輝不足萬里青天嫦娥何處駕此一輪玉寒
光零亂為誰偏照醺綠 年少隨我追涼晚尋幽徑
繞張園森木醉倒金荷家萬里難得尊前相屬老子
平生江南江北最愛臨風笛孫郎微笑坐來聲噴霜
竹

晝夜樂

夜深記得臨歧語說花時歸來去教人每日思量到處與誰分付其奈冤家無定據約雲朝又還雨暮將淚入鴛衾總不成行步元來也解知思慮一封書深相許情知玉帳堪歡爲向金門進取直待腰金拖紫後有夫人縣君相與爭奈會分疎沒嫌伊門路

逍遙樂

春意漸歸芳草故國佳人千里信沈音杳雨潤煙光晚景澄明極目危闌斜照夢當年少對尊前上客鄰枝小鬟燕趙共舞雪歌塵醉裏談笑花色枝枝爭好鬢絲年年漸老如今遇風景空瘦損向誰道東君幸賜與天幕翠遮紅繞休休醉鄉歧路華胥蓬島

雨中花慢送彭文思使君

政樂中和夷夏宴喜官梅乍傳消息待新年歡計斷送春色桃李成陰甘棠少訟又移旌戟念畫樓朱閣風流高會頓冷談席西州縱有舞裙歌板誰共茗邀棋敵歸來未先霑離袖管絃催滴樂事賞心易散良辰美景難得會須醉倒玉山扶起更傾春碧

醉蓬萊

對朝雲鬢鬢暮雨霏微翠峯相倚巫峽高唐鎖楚宮

佳麗畫戟移春靚妝迎馬向一川都會萬里投荒一身弔影成何歡意 盡道黔南去天尺五望極神州萬重煙水尊酒公堂有中朝佳士荔頰紅深麝臍香滿醉舞裊歌袂杜宇催人聲聲到曉不如歸是

又 竄易前詞

對朝雲鬢黷暮雨霏微翠峯相倚巫峽高唐鎖楚宮佳麗蘸水朱門半空霜戟自一川都會虜酒千杯夷歌百轉迫人垂淚 人道黔南去天尺五望極神京萬種煙水懸榻相迎有風流千騎荔臉紅深麝臍香滿醉舞裊歌袂杜宇催人聲聲到曉不如歸是

滿庭芳 詠茶 ○或刻蘇子瞻 ○舊刻六首攷北苑春風是秦少游作刪去

北苑龍團江南鷹爪萬里名動京關碾輕羅細瓊蕊暖生煙一種風流氣味如甘露不染塵凡纖纖捧冰瓷瑩玉金縷鷓鴣斑 相如方病酒銀瓶蟹眼波怒濤翻爲扶起尊前醉玉頰山飲罷風生兩腋醒魂到明月輪邊歸來晚文君未寢相對小窗前

又 雪中戲呈友人 ○或刻惜香樂府

風力驅寒雲容呈瑞曉來到處花飛徧裝瓊樹春意到南枝便是漁蓑舊畫綸竿重橫玉低垂今宵裏香

閨邃館幽賞事偏宜
風流金馬客歌鬟醉擁馬帽
斜欹問人間何處鵬運天池且共周郎按曲音微誤
首已先回同心事丹山路穩長伴綵鸞歸

又

明眼空青忘憂萱草翠玉閒淡梳妝小來歌舞長是
倚風光我已逍遙物外人冤道別有思量難忘處良
辰美景襟袖有餘香
鴛鴦頭白早多情易感紅蓼
池塘又須得尊前席上成雙此子風流罪過都說與
明月空牀難拘管朝雲暮雨分付楚襄王

又

初縮雲鬟才勝羅綺便嫌柳巷花街占春才子容易
託行媒其奈風流債負煙花部不免差排劉郎恨桃
花片片流水惹塵埃
風流賢太守能籠翠羽宜醉
金釵且留取垂楊掩映廳階直待朱幡去後從伊便
窄襪弓鞋知恩否朝雲暮雨還向夢中來

又

脩水濃青新條淡綠翠光交映虛亭錦鴛霜鷺荷徑
拾幽蘋香渡闌干屈曲紅妝映薄綺疎櫺風清夜橫
塘月滿水淨見移星
堪聽微雨過嬾姍藻荇瑣碎
浮萍便移轉胡牀湘簟方屏練靄鱗雲旋滿聲不斷

簷響風鈴重開宴瑤池雪沁山露佛頭青

水調歌頭

瑤草一何碧春入武陵溪溪上桃花無數枝上有黃鸝我欲穿花尋路直入白雲深處浩氣展虹蜺祇恐花深裏紅霧溼人衣坐玉石倚玉枕拂金徽謫仙何處無人伴我白螺杯我爲靈芝仙草不爲絳脣丹臉長嘯亦何爲醉舞下山去明月逐人歸

又

落日塞垣路風勁戛貂裘翩翩數騎閒獵深入黑山頭極目平沙千里唯見瑠弓白羽鐵面駿驄隱隱望青冢特地起閒愁漢天子方鼎盛四百州玉顏皓齒深鎖三十六宮秋堂有經綸賢相邊有縱橫謀將不減翠蛾羞戎虜和樂也聖主永無憂

促拍滿路花往時有人書此詞於州東酒肆壁

間愛其詞不能歌也一十年前有醉道士歌於廣陵市中羣小兒隨歌得之乃知其爲促拍滿路花也俗子口傳加釀鄙語政敗其好處山谷老人爲錄舊文以告深於義味者

秋風吹渭水落葉滿長安黃塵車馬道獨清閒自然爐鼎虎繞與龍盤九轉丹砂就琴心三疊蕊宮看舞

胎仙任萬釘寶帶貂蟬富貴欲薰天黃梁炊未熟夢
驚殘是非海裏直道作人難袖手江南去白蘋紅蓼
又尋滄浦廬山

洞仙歌 瀘守王補之生日

月中丹桂自風霜難老閱盡人間盛衰草望中秋纔
有幾日十分圓靈風雨雲表常如永晝 不得文章
力白首防秋誰念雲中上功守正注意得人雄靜掃
河西應難指五湖歸棹問持節馮唐幾時來看再策
勳名印窠如斗

驀山溪

山圍江暮天鏡開晴絮斜影過梨花照文星老人星
聚清尊一笑歡甚卻成愁別時襟餘點點疑是高唐
雨 無人知處夢裏雲歸路回雁曉風清雁不來啼
鴉無數心情老嬾尤物解宜人春盡也有南風好便
迴帆去

又贈衡陽妓陳湘

鴛鴦翡翠小小思珍偶眉黛斂秋波儘湖南山明水
秀俚俚儂儂恰近十三餘春未透花枝瘦政是愁時
候 尋芳載酒肯落誰人後只恐晚歸來綠成陰青
梅如豆心期得處每自不隨人長亭柳君知否千里

猶回首

又至宜州作寄贈陳湘

稠花亂蕊一作葉到處撩人醉林下有孤芳不匆匆
成蹊桃李今年風雨莫送斷腸紅斜枝倚風塵裏不
帶塵風氣微噴又喜約略知春味江上一帆愁夢
猶尋歌梁舞地如今對酒不似那回時書慢一作罷
寫夢來空只有相思是

又

山明水秀盡屬詩人道應是五陵兒見衰翁孤吟絕
倒一觴一詠瀟灑寄高閒松月下竹風閒試想爲襟
抱玉關遙指萬里天衢杏筆陣掃秋風瀉珠璣琅
琅皎皎臥龍智略三詔佐昇平煙塞事玉堂心頻把
菱花照

望遠行勾尉有所盼爲太守所猜兼此生有所

愛住馬湖馬湖出丁香核荔枝常以遺生故
戲及之

自見來虛過卻好時好日這訛尿管
據眼前言定也有十分七八冤我無心除告佛
人間底且放我快活得便索些別茶祇待又怎不遇
偎花映月且與一班半點只怕你沒丁香核

憶帝京

銀燭生花如紅豆占好事如今有人醉曲屏深借寶
瑟輕招手一陣白蘋風故滅燭教相就花帶雨冰
肌香透恨啼鳥轆轤聲曉柳岸微涼吹殘酒斷腸人
依舊鏡中銷瘦恐那人知後鎮把你來僞憇

又贈彈琵琶妓

薄妝小靨閒情素抱著琵琶凝竚慢撚復輕攏切切
如私語轉撥割朱絃一段驚沙去萬里嫁烏孫公
主對易水明妃不渡粉淚行行紅顏片片指下花落
狂風雨借問本師誰斂撥當胸住

又黔州張侔生日

鳴鳩乳燕春閒暇化作綠陰槐夏壽學舞紅裳睡鴨
飄香麝醉此洛陽人佐郡深儒雅況坐上玉麟金
馬更莫問鶯老花謝萬里相依千金爲壽未厭玉燭
傳清夜不醉欲言歸笑殺高陽社

撼庭行 宰太和日吉州城外作

嗚咽南樓吹落梅聞鴉樹驚飛夢中相見不多時隔
城今夜也應知坐久水空碧山月影沈西買箇宅
兒住著伊剛不肯相隨如今卻被天嗔你永落雞羣
受雞欺空恁惡憐伊風日損花枝

下水船

總領神仙侶齊到青雲岐路丹禁風微咫尺諦聞天
語盡榮遇看卽如龍變化一擲靈梭風雨 真遊處
上苑尋春去芳草芊芊迎步幾曲笙歌櫻桃豔裏歡
聚瑤觴舉回祝堯齡萬萬端的君恩難負

歸田樂引

暮雨濛階砌漏漸移轉添寂寞點點心如碎怨你又
戀你恨你惜你畢竟教人怎生是 前歡算未已奈
向如今愁無計爲伊聰俊銷得人憔悴這裏誚睡裏
誚睡裏夢裏心裏一向無言但垂淚

又

對景還銷瘦被箇人把人調戲我也心兒有憶我又
喚我見我嗔我天甚教我怎生受 看承幸廝勾又
是尊前眉峯皺是人驚怪冤我忒攔就拚了又舍了
一定是這回休了及至相逢又依舊

離亭燕

次韻答黎功略見寄

十載尊前談笑天祿故人年少可是陸沈英俊地看
卽鎖窗批詔此處忽相逢潦倒禿翁同調 西顧郎
官湖渺事看庾樓人小短艇絕江空悵望寄得詩來
高妙夢去倚君旁胡蝶歸來清曉

千秋歲少游得謫嘗夢中作詞云醉臥古藤陰
下了不知南北竟以元符庚辰死於藤州光
華亭上崇寧甲申庭堅竄宜州道過衡陽覽
其遺墨始追和其千秋歲詞
苑邊花外記得同朝退飛騎軋鳴珂碎齊歌雲繞扇
趙舞風回帶嚴鼓斷杯盤狼籍猶相對
灑淚誰能
會醉臥藤陰蓋人已去詞空在兔園高宴悄虎觀英
遊改重感慨波濤萬頃珠沈海

又

世間好事恰恁廝當對乍夜永涼天氣雨稀簾外滴
香篆盤中字長入夢如今見也分明是歡極嬌無
力玉軟花欹墜釵鬢袖雲堆臂燈斜明媚
汗浹薔騰醉奴奴睡奴奴睡也奴奴睡

江城子憶別

畫堂高會酒闌珊倚闌干霎時間千里關山常恨見
伊難及至而今相見了依舊似隔關山
倩人傳語
問平安省愁煩淚休彈哭損眼兒不似舊時單尋得
石榴雙葉子憑寄與插雲鬢

又

新來曾被眼奚搐不甘伏怎拘束似夢還真煩亂損

心曲見面暫時還不見看不足惜不足不成歡笑
不成哭戲人目遠山蹙有分看伊無分共伊宿一貫
一文蹺十貫千不足萬不足

兩同心

巧笑眉顰行步精神隱隱似朝雲行雨弓弓樣羅韞
生塵尊前見玉檻彫籠堪愛難親下自言家住天津
生小從人恐舞罷隨風飛去顧阿母教穿珠裙從今
去唯願銀釭莫照離尊

又

一笑千金越樣情深會共結合歡羅帶終願効比翼
紋禽許多時靈利惺惺驀地昏沈自從官不容針
直至而今你共人女邊著子爭知我門裏挑心記攜
手小院回廊月影花陰

又

秋水遙岑妝淡情深儘道教心堅穿石更說甚官不
容針霎時間雨散雲歸無處追尋小樓朱閣沈沈
一笑千金你共人女邊著子爭知我門裏挑心最難
忘小院回廊月影花陰

少年心

對景惹起愁悶染相思病成方寸是阿誰先有意阿

誰薄倖斗頓恁少喜多嗔 台下休傳音問你有我
我無你分似合歡桃核真堪人恨心兒裏有兩箇人
人

又添字

心裏人人暫不見霎時難過天生你要憔悴我把心
頭從前鬼著手摩挲抖擻了百病銷磨 見說那廝
脾鬻熱大不成我便與拆破待來時鬲上與廝噉則
箇溫存著且教推磨

青玉案 至宜州次韻上酬七兄

煙中一線來時路極目送歸鴻去第四陽關雲不度
山胡新轉子規言語正在人愁處 憂能損性休朝
暮憶我當年醉時句舊詩云我自只如常日醉滿川
風月替人愁渡水穿雲心已許暮年光景小軒南浦
同捲西山雨

又寅庵解萍實宰作今附此

行人欲上來時路破曉霧輕寒去隔葉子規聲暗度
十分酒滿舞裯歌袖沾夜無尋處 故人近送旌旗
暮但聽陽關第三句欲斷離腸餘幾許滿天星月看
人憔悴燭淚垂如雨

喝火令

見晚情如舊交疎分已深舞時歌處動人心煙水數
年魂夢無處可追尋 昨夜燈前見重題漢上襟便
愁雲雨又難尋曉也星稀曉也月西沈曉也雁行低
度不會寄芳音

品令送黔守曹伯達供備

敗葉霜天曉漸鼓吹催行棹栽成桃李未開便解銀
章歸去取麒麟圖畫要及年少 勸君醉倒別語怎
醒時道楚山千里暮雲鎮鎖離人懷抱記取江州司
馬座中最老

又茶詞

鳳舞團團餅恨分破教孤令金渠體淨隻輪慢碾玉
塵光瑩湯響松風早減了二分酒病 味濃香永醉
鄉路成佳境恰如燈下故人萬里歸來對影口不能
言心下快活自省

漁家傲予嘗戲作詩云大葫蘆挈小葫蘆惱亂

檀那得便沽每到夜深人靜後小葫蘆入大

葫蘆又云大葫蘆乾枯小葫蘆行沽一往金

僊宅一往黃公壚有此通大道無此令人老

不問惡與好兩葫蘆俱倒或請以此意倚聲

律作詞使人歌之爲作漁家傲

踏破草鞋參到老等閒拾得衣中寶遇酒逢花須一
笑重年少俗人不用噴貧道 是處青旗誇酒好醉
鄉路上多芳草提著葫蘆行未到風落帽葫蘆卻纏
葫蘆倒

又江寧江口阻風戲効寶甯勇禪師作古漁家
傲玉環中云廬山中人頗欲得之試思索始
記四篇

萬水千山來此土本提心印傳梁武對朕者誰渾不
顧成死語江頭暗折長蘆渡 面壁九年看二祖一
花五葉親分付隻履提歸葱嶺去君知否分明忘卻
來時路

又

三十年來無孔竅幾回得眼還迷照一見桃花參學
了呈法要無絃琴上單于調 摘葉尋枝虛半老拈
花特地重年少今後水雲人欲曉非玄妙靈雲合破
桃花笑

又

憶昔藥山生一虎華亭船上尋人渡散卻夾山拈坐
具呈見處繫驢橛上合頭語 千尺垂絲君看取離
鉤二三寸無生路驀口一橈親子父猶回顧瞎驢喪我

兒孫去

又

百丈峯頭開古鏡馬駒踏殺重蘇醒接得古靈心眼
淨光炯炯歸來藏在袈裟影好箇佛堂佛不聖祖
師沈醉猶看鏡卻與斬新提祖令方猛省無聲三昧
天皇餅

醜奴兒

得意許多時長醉賞月下花枝暴風急雨年年有金
籠鎖定鶯雛燕友不被雞欺紅旆轉逶迤悔無計
千里追隨再來重綰瀘南印而今日下恹惶怎向日
永春遲

又

濟楚好得些憔悴損都是因它那回得句閒言語旁
人盡道你管又還鬼那人吵得過口兒嘛直勾得
風了自家是卽好意也毒害你還甜殺人了怎生申
報孩兒

定風波

次高左藏使君韻

萬里黔中一漏天屋居終日似乘船及至重陽天也
霽催醉鬼門關近蜀江前莫笑老翁猶氣岸君看
幾人白髮上華顛戲馬臺前追兩謝馳射風情猶拍

古人肩

又

把酒花前欲問溪，問溪何事晚聲悲。名利往來人盡老，誰道溪聲今古有休時。且共玉人斟玉醕，休訴笙歌一曲黛眉低。情似長溪長不斷，君看水聲東去月輪西。

又

小院難圖雲雨期，幽歡渾待賞花時。到得春來君卻去，相誤不須言語淚雙垂。密約尊前難囑付，偷顧手搓金橘斂雙眉。庭樹清風明月媚，須記歸時莫待杏花飛。

又次左藏韻

自斷此生休問天，白頭波上泛膠船。老去文章無氣味，惟悴不堪驅使菊花前。聞道使君攜將吏，高會參軍吹帽晚風顛。千騎插花秋色暮，歸去翠娥扶入醉時肩。

又

晚歲鹽州聞荔枝，赤英垂墜壓闌枝。萬里來來逢芳意，歇愁絕滿盤空憶去年時。澗草山花光照座，春過等閒枯李又。纍纍辜負寒泉浸，紅皺銷瘦有人花病。

損香肌

又

淮擬階前摘荔枝今年歇盡去年枝莫是春光廝料
理無比譬如痲瘡有休時 碧豨朱闌情不淺向晚
來年枝上報纍纍雨後園林坐清影蘇醒紅裳剝盡
看香肌

又

上客休辭酒淺深素兒歌裏細聽沈粉面不須歌扇
掩閒靜一聲一字總關心 花外黃鸝能密語休訴
有花能得幾時斟畫作遠山臨碧水明媚夢爲胡蝶
去登臨

又客有兩新鬟善歌者請作送湯曲因戲前二

物

歌舞闌珊退晚妝主人情重更留湯冠帽斜欹辭醉
去邀定玉人纖手自磨香 又得尊前聊笑語如許
短歌宜舞小紅裳寶馬促歸朱戶閉 一云醉裏還家
明亦未人睡夜來應恨月侵牀

河傳有士大夫家歌秦少游瘦殺人天不管之

曲以好字易瘦字戲爲之作

心情老嬾對歌對舞猶是當時眼巧笑靚妝近我衰

容華鬢似扶著賣卜算。思量好箇當年見催酒催
更只怕歸期短飲散燈稀背鎖落花深院好殺人天
不管

撥棹子

歸去來歸去來攜手舊山歸去來有人共對月尊壘
橫一琴甚處逍遙不自在。閱世界無利害何必向
世間甘幻愛與君釣晚煙寒瀨蒸白魚稻飯溪童供
筍菜

蝶戀花

海角芳菲留不住筆下風生吹入青雲去仙籍有名
天賜與致君事業安排取。要識世間平坦路當使
人人各有安身處黑髮便逢堯舜主笑人白首耕南
畝

步蟾宮

蟲兒真箇惡靈利惱亂得道人眼起醉歸來恰似出
桃源但目斷落花流水。不如隨我歸雲際共作箇
住山活計照清溪勻粉面插山花算終勝風塵滋味

踏莎行 茶詞

畫鼓催春蠻歌走餉火前一焙爭春長低株摘盡到
高株高株別是閩溪樣。碾破春風香凝午帳銀瓶

雪袞翻匙浪今宵無睡酒醒時摩圍影在秋江上

又

臨水天桃倚牆繁李長楊風掉青驄尾尊中有酒且
酬春更尋何處無愁地 明日重來落花如綺芭蕉
漸展山公啟欲將心事寄天公教人長壽花前醉

醉落魄 舊有一曲云醉醒醒醉憑君會取這滋味

濃斟琥珀香浮蟻一入愁腸便有陽春意須

將幕席為天地歌前起舞花前睡從它兀兀

陶陶裏猶勝醒醒惹得閱憔悴此曲亦有佳

句而多斧鑿痕又語高下不甚入律或傳是

東坡語非也與蝸角虛名解下癡條之曲相

似疑是王仲父作因戲作二篇呈吳元祥黃

中行似能厭道二公意中事

陶陶兀兀尊前是我華胥國爭名爭利休休莫雪月

風花不醉怎歸得 邯鄲一枕誰憂樂新詩新事因

閑適東山小妓攜絲竹家裏樂天村裏謝安石石曼

卿自嘲云村裏黃緡綽家中白侍郎

又

陶陶兀兀人生無累何由得杯中三萬六千日悶損

旁觀我但醉落托 扶頭不起還頽玉日高春睡平
生足誰門可款新筠熟安樂春泉玉醴荔枝綠親賢
宅四酒名

又老夫止酒十五年矣到戎州恐爲瘴癘所侵
故晨舉一杯不相察者乃強見酌遂能作病
因復止酒用前韻作二篇呈吳元祥

陶陶兀兀人生夢裏槐安國教公休醉公但莫盞倒
垂蓮一笑是贏得 街頭酒賤民聲樂尋常行處逢
歡適醉看簷雨森銀燭我欲憂民渠有二千石

又

陶陶兀兀醉鄉路遠歸不得心情那似當年日割愛
金荷一盃淡不拓 異鄉薪桂炊香玉摩挲經笥須
知足明年小麥能秋熟不管經霜點盡鬢邊綠

玉樓春

當塗解卸後一日郡中置酒呈郭功甫

凌歊臺上青青麥姑熟堂前餘翰墨暫分一印管江
山稍爲諸公分皂白 江山依舊雲空碧昨日主人
今日客誰分賓主強惺惺問取磯頭新婦石

又 竄易前詞

翰林本是神仙謫落帽風流傾座席坐中還有賞音
人能岸烏紗傾大白 江山依舊雲橫碧昨日主人

今日客誰分賓主強惺惺問取磯頭新婦石

又次前韻再呈功甫

青壺乃似壺中謫萬象光輝森宴席紅塵鬧處便休
休不是箇中無皂白 歌煩舞倦朱成碧春草池塘

凌謝客共君商略老生涯歸種玉田秧白石

又庾元鎮四十兄庭堅四十年翰墨故人庭堅

假守當塗元鎮窮不出入州縣席上作樂府

長句勸酒

庾郎三九常安樂使有萬錢無處著徐熙小鴨水邊

花明月清風都占卻 朱顏老盡心如昨萬事休休

休莫莫尊前見在不饒人歐舞梅歌君更酌歐梅當

時二妓也

又用前韻贈郭功甫

少年得意從軍樂晚歲天教閒處著功名富貴久寒

灰翰墨文章新諱卻 是非不用分今昨雲月孤高

公也莫喜歡為地醉為鄉飲客不來但自酌

又

風開冰面魚紋皺暖入芳心犀點透乍看晴日弄柔

條憶得章臺人姓柳 心情老大癡成就不復淋浪

沾翠袖早梅獻笑尚窺鄰小蜜竊香如遺壽

又

東君未試雷霆手灑雪開春春鎖透帝臺應點萬年
枝窮巷偏欺三徑柳 峯排羣玉森相就中有摩圍
爲領袖凝香窗下與誰看一曲琵琶千萬壽

又

新年何許春光漏小院閒門風日透酥花入座頗欺
梅雪絮因風全是柳 使君落筆春詞就應喚歌檀
催舞袖得開眉處且開眉人世可能金石壽

又

黃金捍撥春風手簾幕重重音韻透梅花破萼便春
回似有黃鸝鳴翠柳 曉妝未愜梅添就玉筍捧杯
離細袖會拚千日笑尊前它日相思空損壽

又

黔中士女遊晴晝花信輕寒羅綺透爭尋穿石道宜
男更買江魚雙貫柳 竹枝歌好移船就依倚風光
垂翠袖滿傾蘆酒指摩圍相守與郎如許壽

又

可憐翡翠隨雞走學綰雙鬟年紀小見來行待惡憐
伊心性嬌癡空解笑 紅渠照映霜林來楊柳舞腰
風嫋嫋衾餘枕賸儘相容只是老人難再少

虞美人 舊刻三調 攷波聲拍枕長淮曉是子瞻

作刪去○至當塗呈郭功甫

平生本愛江湖住鷗鷺無人處江南江北水雲連莫
笑醯雞歌舞甕中天 當塗艤棹蒹葭外賴有賓朋
在此身無路入修門慚愧詩翁清此與招魂

又宜州見梅作

天涯也有江南信梅破知春近夜闌風細得香遲不
道曉來開徧向南枝 玉臺弄粉花應妒飄到眉心
住平生箇裏願杯深去國十年老盡少年心

南鄉子 重九日涪陵作示知命弟

落帽晚風回又報黃花一番開扶杖老人心未老哈
哉漫有才情付與誰 芳意正徘徊傳語西風且慢
吹明日餘尊還共倒重來未必秋香一夜衰

又今年重九知命已向成都感之復次前韻

招喚欲千回暫得尊前笑口開萬水千山還麼去悠
哉酒向黃花欲醉誰 顧影且徘徊立到斜風細雨
吹見我未衰容易去還來不道年年即漸衰

又

未報賈船回三徑荒鋤菊臥開想得鄰舟野笛罷沾
衣不為涪翁更為誰 風力嫻萸枝酒面紅鱗愜細

吹莫笑插花和事老摧顏卻向人間耐盛衰

又

黃菊滿東籬與客攜壺上翠微已是有花兼有酒良
期不用登臨上落暉 滿酌不須辭莫待無花空折
枝寂寞酒醒人散後堪悲節去蜂愁蝶不知

又重陽日寄懷永康彭道微使君用東坡韻

臥稻雨餘收處處遊人簇遠洲白髮又挨紅袖醉戎
州亂摘黃花插滿頭 青眼想風流畫出西樓一燈
秋卻憶去年歡意舞梁州塞雁西來特地愁

又重陽日宣州城樓宴集卽席作

諸將說封侯短笛長歌獨倚樓萬事盡隨風雨去休
休戲馬臺南金絡頭 催酒莫遲留酒味今秋似去
秋花向老人頭上笑羞羞白髮簪花不解愁

鵲橋仙 次東坡七夕韻

八年不見清都絳闕望銀漢溶溶樣樣銀 一作河年
年牛女恨風波算此事人間天上 野麋豐草江鷗
遠水老夫唯便疎放百錢端往問君平早晚具歸田
小舫

又席上賦七夕詞

朱樓彩舫浮瓜沈李報答春風有幾一年尊酒暫時

同別淚作人間曉雨 鴛鴦機綜能令儂巧也待乘
槎仙去若逢海上白頭翁共一訪癡牛驂女

鷓鴣天 或刻蘇子瞻但山邊白鳥作山前白鷺
如今更有作于今尚有底事作欲避○玄真

子詠漁父云西塞山邊白鷺飛桃花流水鱖
魚肥青箬笠綠蓑衣斜風細雨不須歸東坡

嘗以浣溪沙歌之矣表第季如箎云以鷓鴣
天歌之更叶音律但少數句耳因以玄真子

遺事足之憲宗時畫玄真子像訪之江湖不
可得因令集其歌詩上之玄真之兄松齡懼

玄真放浪而不返也和答其漁父云樂在風
波釣是閑草堂松桂已勝攀太湖水洞庭山

狂風浪起且須還此余續成之意也
西塞山邊白鳥飛桃花流水鱖魚肥朝廷尚覓玄真

子何處如今更有詩 青箬笠綠蓑衣斜風細雨不
須歸人間底事風波險一日風波十二時

又重九日集句
塞雁初來秋影寒霜林風過葉聲乾龍山落帽千年

事我對西風猶整冠 蘭委佩菊堪餐人情時事半
悲歡但將酩酊酬佳節更把茱萸仔細看

又坐中有眉山山隱客史應之和前韻卽席答之
黃菊枝頭生曉寒人生莫放酒杯乾風前橫笛斜吹
雨醉裏簪花倒著冠身健在且加餐舞裙歌板盡
情歡黃花白髮相牽挽付與旁人冷眼看

又明日獨酌自嘲呈史應之

萬事令人心骨寒故人墳上土新乾淫坊酒肆閒居
士李下何妨也整冠金作鼎玉爲餐老來亦失少
時歡茱萸菊蕊年年事十日還將九日看

又

紫菊黃花風露寒平沙戲馬雨聲乾且看欲盡花經
眼依說彈冠與整冠甘酒病廢朝餐何人得似醉
中歡十年一覺揚州夢爲報時人洗眼看

又

節去蜂愁蝶不知曉庭環繞折殘枝自然今日人心
別未必秋香一夜衰無閒事卽芳期菊花須插滿
頭歸宜將酪酏酬佳節不用登臨送落暉

又

聞說君家有翠娥施朱施粉總嫌多背人語處藏珠
履戲得羞時整玉梭拖遠岫壓橫波何時傳酒更
傳歌爲君寫就黃庭了不要山陰道士鵝

又吉祥長老設長松湯為作有僧病痲癩嘗死
金剛窟有人見者教服長松湯遂復為完人

湯泛冰簷一坐春長松林下得靈根吉祥老子親拈
出箇箇教成百歲人 燈焰焰酒醺醺壑源曾未破
醒魂與君更把長生盃略為清歌駐白雲

鼓笛令 戲詠打揭

酒闌命友閒為戲打揭兒非常愜意各自輸贏只賭
是賞罰采分明須記 小五出來無事卻跋翻和九
底若要十一花下死那管十三不如十二

又

寶犀未解心先透惱殺人遠山微皺意淡言疎情最
厚枉教作著行官柳 小雨勒花時候抱琵琶為誰
清瘦翡翠金籠思珍偶忽拚與山雞儂憇

又

見來兩兩寧寧地眼廝打過如拳踢恰得嘗些三香甜
底苦殺人遭誰調戲 臘月望州坡上地凍著你影
蹉村鬼你但那些一處睡燒沙糖管好滋味

又

見來便覺情於我廝守著新來好過人道他家有婆
婆與一口管教尿磨 副靖傳語木大鼓兒裏且打

一和更有此兒得處囉燒沙糖香藥添和

浪淘沙荔枝

憶昔謫巴蠻荔枝親攀冰肌照映柘枝冠日擘輕紅
三百顆一味甘寒重入鬼門關也似人間一雙和
葉插雲鬟賴得清湘燕玉面同倚闌干

留春令

江南一雁橫秋水嘆咫尺斷行千里回紋機上字縱
橫欲寄遠憑誰是謝客池塘春都未微微動短牆
桃李半陰纔暖卻清寒是瘦損人天氣

南歌子

槐綠低窗暗榴紅照眼明玉人邀我少留行無奈一
帆煙雨畫船輕柳葉隨歌皺梨花與淚傾別時不
似見時情今夜月明江上酒初醒

又

詩有淵明語歌無子夜聲論文思見老彌明坐想羅
浮山下羽衣輕何處黔中郡遙知隔晚晴雨餘風
急斷虹橫應夢池塘春草若爲情
又東坡過楚州見淨慈法師作南歌子用其韻

贈郭詩翁二首

郭大曾名我劉翁復是誰入塵能作和鑼椎特地干

珍傲宋版印
戈相待使人疑
秋浦橫波眼
春窗遠岫眉
普陀巖畔夕陽遲
何似金沙灘上放憨時

又

萬里滄江月
清波說向誰
頊門須更下
金椎只恐風驚草動
又生疑
金雁斜妝頰
青螺淺畫眉
庖丁有底下刀遲
直要人牛無際是休時

望江東

江水西頭隔煙樹
望不見江東路
思量只有夢來去
更不怕江闌住
燈前寫了書
無數算沒箇人傳與
直饒尋得雁
分付又還是秋將暮

一落索

誰道秋來煙景素
任遊人不顧一番時態
一番新到得意皆歡慕
紫萸黃菊繁華處
對風庭月露
愁來即便去
尋芳更作甚悲秋賦

西江月 老夫既戒酒不飲
遇宴集獨醒其旁坐

客欲得小詞
援筆爲賦

斷送一生唯有破除萬事
無過遠山微影
蘸橫波不飲旁人笑我
花病等閒瘦
惡春來沒箇遮
闌杯行到手莫留殘
不道月明人散

又茶詞

龍焙頭綱春早谷簾第一泉香已醺浮蟻嫩鵝黃想
見翻匙雪浪免謁金絲寶盃松風蟹眼新湯無因
更發次公狂甘露來從仙掌

又崇寧甲申遇惠洪上人於湘中洪作長短句

見贈云大廈吞風吐月小舟坐水眠空霧窗
春色翠如蔥睡起雲濤正擁往事回頭笑處
此生彈指聲中玉牋佳句敏驚鴻聞道衡陽
價重次韻酬之時余方謫宜陽而洪歸分寧

龍安

月側金盆墮水雁回醉墨書空君詩秀色雨園葱想
見衲衣寒擁蟻穴夢魂人世楊花蹤跡風中莫將
社燕等秋鴻處處春山翠重

又

別夢已隨流水淚巾猶裛香泉相如依舊是癯仙人
在瑤臺閬苑花霧縈風縹緲歌珠滴水清圓娥眉
新作十分妍去馬歸來便面

又

宋玉短牆東畔桃源落日西斜濃妝下著繡簾遮鼓
笛相催清夜轉眄驚翻長袖低徊細踏紅靴舞餘
猶顫滿頭花嬌學男兒拜謝

桃源憶故人

碧天露洗春容淨淡月曉收殘暈花上密煙飄盡花
底鶯聲嫩 雲歸楚峽厭厭困雨點遙山新恨和淚
暗彈紅粉生怕人來問

畫堂春 舊刻二調 攷東風吹柳日初長是淮海

作刪去

摩圍小隱枕蠻江蛛絲閒鎖晴窗水風山影上修廊
不到晚來涼 相伴蝶穿花徑獨飛鷗舞溪光不因
送客下繩牀添火炷爐香

賀聖朝

脫霜披茜初登第名高得意櫻桃榮宴玉墀遊領羣
仙行綴 佳人何事輕相戲道得之何濟君家聲譽
古無雙且均平居二

阮郎歸 曾勇文既眇陳湘歌舞便出其類學書

亦進來求小楷作阮郎歸詞付之

盈盈嬌女似羅敷湘江明月珠起來綰髻又重梳弄
妝仍學書 歌調態舞工夫湖南都不如它年未厭
白髭鬚同舟歸五湖

又効福唐獨木橋體作茶詞

烹茶留客駐彫鞍有人愁遠山別郎容易見郎難月

斜窗外山 歸去後憶前歡畫屏金博山一杯春露
莫留殘與郎扶玉山

又茶詞

歌停檀板舞停鸞高陽飲興闌獸煙噴盡玉壺乾香
分小鳳團 雪浪淺露花圓捧甌春筍寒絳紗籠下
躍金鞍歸時人倚闌

又茶詞

摘山初製小龍團色和香味全碾聲初斷夜將闌烹
時鶴避煙 消滯思解塵煩金甌雪浪翻只愁啜罷
水流天餘清攪夜眠

又茶詞

黔中桃李可尋芳摘茶人自忙月團犀胯鬪圓方研
膏入焙香 青箬裹絳紗囊品高聞外江酒闌傳盃
舞紅裳都濡春味長都濡地名

又

退紅衫子亂蜂兒衣寬只爲伊爲伊去得忒多時教
人直是疑 長睡晚理妝遲愁多嬾畫眉夜來算得
有歸期燈花則甚知

又

貧家春到也騷騷瓊漿注小槽老夫不出長蓬蒿隣

牆開碧桃 木芍藥品題高一枝煩剪刀傳杯猶似少年豪醉紅侵雪毛

更漏子 詠餘甘湯

庵摩勒西土果霜後明珠顆顆憑玉兔搗香塵稱為席上珍 號餘甘無奈苦臨上馬時分付管回味卻思量忠言君但嘗

又

體妖嬈鬟婀娜玉甲銀箏照座危柱促曲聲殘王孫帶笑看 休休休莫莫愁撥箇絲中索了了了玄玄玄山僧無怨禪

清平樂

黃花當戶已覺秋容暮雲夢南州逢笑語心在歌邊舞處 使君一笑眉開新晴照酒尊來且樂尊前見在休思走馬章臺

又

休推小戶看即風光暮萸糝菊英浮盃醕親賢宅酒名報答風光有處 幾回笑口能開少年不肯重來借問牛山繫馬今為誰姓池臺

又

舞鬟娟好白髮黃花帽醉任旁觀嘲潦倒扶老偏宜

年小舞回臉玉胸酥纏頭一斛明珠日日梁州薄
媚年年金菊茱萸

又示知命

乍晴秋好黃菊欹烏帽不見清談人絕倒更憶添丁
小小蜀娘漫點花酥酒槽空滴真珠兄弟四人別
住它年同插茱萸

又

春歸何處寂寞無行路若有人知春去處喚取歸來
同住春無蹤跡誰知除非問取黃鸝百轉無人能
解因風吹過薔薇

又

冰堂酒好只恨銀杯小新作金荷工獻巧圖要連臺
拗倒唐龍朔中子母相去連臺拗倒俗謂杯盤爲子
母又盤爲臺採蓮一曲清歌急檀催捲金荷醉裏
香飄睡鴨更驚羅襪凌波

好事近湯詞

歌罷酒闌時瀟灑座中風色主禮到君須盡奈賓朋
南北暫時分散總尋常難堪久離拆不似建溪春
草解留連佳客

又太平州小妓楊姝彈琴送酒

一弄醒心絃情在兩山斜疊彈到古人愁處有真珠
承睫使君來去本無心休淚界紅頰自恨老來憎
酒負十分金葉

又

不見片時霎魂夢鎮相隨著因甚近新無據誤竊香
深約思量模樣忔憎兒惡又怎生惡終待共伊相
見與佯佯奚落

謁金門 示知命弟

山又水行盡吳頭楚尾兄弟燈前家萬里相看如夢
寐君似成蹊桃李入我草堂松桂莫厭歲寒無氣
味餘生吾已矣

好女兒 張寬夫園賞梅

小院一枝梅衝破曉寒開偶到張園遊戲沾袖帶香
回玉酒覆銀杯盡醉去猶待重來東鄰何事驚吹
怨曲雪片成堆曲一作笛

又

春去幾時還問桃李無言燕子歸棲風勁梨雪亂西
園唯有月嬋娟似人人難近如天願教清影常相
見更乞取團圓

又

粉淚一行行啼破曉來妝
嬾繫酥胸羅帶羞見繡鴛
鴦擬待不思量怎奈向目
下恹惶假饒來後教人
見了卻去何妨

減字木蘭花登巫山縣樓作

襄王夢裏草綠煙深何處
是宋玉臺頭暮雨朝雲幾
許愁飛花漫漫不管羈人
腸欲斷春水茫茫要渡
南陵更斷腸

又距施州二十里張仲謀遣騎相迎因送所和樂府來且約近郊相見復用前韻先往

史君那裏千騎塵中依約
是拂我眉頭無處重尋庾
信愁山雲瀾漫夾道旌旗
聯復斷萬事茫茫分付
澄波與爛腸

又巫山縣追懷老杜

巫山古縣老杜淹留情始
見撥悶題詩千古神交世
不知雲陽臺下更值清明
風雨夜知道愁辛果是
當時作賦人

又次韻趙文儀

詩翁才刃曾陷文場貔虎
陣誰敢當哉況是焚舟決
勝來三巴春杪客館夢回
風雨曉胸次崢嶸欲共
濤頭赤甲平

又
蒼崖萬仞下有奔雷千百陣自古危哉誰遣西園潛
麼來猿啼雲杪破夢一聲巫峽曉苦喚愁生不是
西園作麼平

又
餘寒爭令雪共臘梅相照映昨夜東風已出耕牛勸
歲功陰陰冪冪近覺去天無幾尺休恨春遲桃李
梢頭次第知

又
終宵忘寐好事如何猶尚未仔細沈吟珠淚盈盈溼
袖襟與君別也願在郎心莫暫捨記取盟言聞早
回程卻再圓

又丙子仲秋奉陪黔陽曹使君伯達翫月作減
字木蘭花兼簡施州張使君仲謀

中秋多雨常是尊疊狼藉去今夜雲開須道姮娥得
得一作特特來不知雲外還有清光同此會笛在
層樓聲徹摩圍頂上頭

又
中秋無雨醉送月啣西嶺去笑口須開幾度中秋見
月來前年江外兒女傳杯兄弟會此夜登樓小謝

清吟慰白頭

又

濃陰驟雨巫峽有情來又去
今夜天開不與姮娥作
伴來
清光無外白髮老人心
自會何處歌樓貪看
冰輪不轉頭

又丙子仲秋黔守席上客有舉岑嘉州中秋詩

曰今夜鄜州月
閨中只獨看
遙憐小兒女
未解憶長安
因戲作

舉頭無語家在月明生處住
擬上摩圍最上峯頭試
望之
偏憐終秀苦淡同甘
誰更有想見牽衣月到
愁邊總未知

又戲答

月中笑語萬里同
依光景住天水相圍
相見無因夢見之
諸兒娟秀儒學傳家
渠自有自作秋衣漸老
先寒人未知

又用前韻示知命弟

常年夜雨頭白相依無去住
兒女成圍歡笑尊前月
照之
阿連高秀千萬里來
忠孝有豈謂無衣歲晚
先寒要弟知

訴衷情舊刻四首
珍珠簾繡幕捲輕霜
是六一

小桃灼灼柳鬢鬢春色滿江南雨晴風暖煙淡天氣
正醺酣山潑黛水按藍翠相攬歌樓酒旆故故招人
權典青衫

又在戎州登臨勝景未嘗不歌漁父家風以謝
江山門生請問先生家風如何爲擬金華道
人作此章

一波纔動萬波隨蓑笠一鉤絲金鱗政在深處千尺
也須垂吞又吐信還疑上鉤遲水寒江淨滿目青
山載月明歸

又
旋揎玉指著紅靴宛宛鬪彎訛天然自有殊態愁黛
不須多分遠岫壓橫波妙難過自欹枕處獨倚闌
時不奈鬢何

採桑子送彭道微使君移知永康軍

荔枝枝灘上留千騎桃李陰繁宴寢香殘畫戟森森鎮
八蠻永康又得風流守管領江山少訟多閒煙靄
樓臺舞翠鬟

又

虛堂密候參同火梨棗枝繁深鎖三關不要樊姬與

小蠻 遙知風雨更闌夜猶夢巫山濃麗清閒曉鏡
新梳十二鬟

又

投荒萬里無歸路雪點鬢繁度鬼門關已揀兒童作
楚蠻 黃雲苦竹啼歸去繞荔枝山蓬戶身間歌板
誰家教小鬟

又

馬湖來舞釵初賜笳鼓聲繁賢將開關威竦西山六
詔蠻 南溪地逐名賢重深鎖羣山燕喜公閒一斛
明珠兩小鬟

又戲贈黃中行

宗盟有技能歌舞宜醉尊壘待約新醅車上危坡盡
要推 西鄰三弄爭秋月邀勒春回箇裏聲催鐵樹
枝頭花也開

又

夜來酒醒清無夢愁倚闌干露滴輕寒兩行芙蓉淚
不乾 佳人別後音塵悄銷瘦難拚明月無端已過
紅樓十二間

又

櫻桃著子如紅豆不管春歸聞道開時蜂惹香鬢蝶

惹衣樓臺燈火明珠翠酒戀歌迷醉玉東西少箇
人人暖被攜

又

城南城北看桃李依倚年華楊柳藏鴉又是無言颺
落花春風一面長含笑偷顧羞遮分付誰家把酒
花前試問他

歸田樂令

引調得甚近日心腸不戀家寧寧地思量他思量他
兩情各自肯相忙咱意思裏莫是賺人吵噉奴真
箇嗚共人嗚

卜算子

要見不得見要近不得近試問得君多少憐管不解
多於恨禁止不得淚忍管不得悶天上人間有底
愁向箇裏都諳盡

菩薩蠻 王荆公新築草堂於半山引入功德水

作小港其上壘石作橋爲集句云數間茅屋
閒臨水窄衫短帽垂楊裏花是去年紅吹開
一夜風梢梢新月偃午醉醒來晚何物最關
情黃鸝三兩聲戲効荆公作

半煙半雨溪橋畔漁翁醉著無人喚疎嬾意何長春

風花草香江山如有待此意陶潛解問我去何之
君行到自知

又淹泊平山堂寒食節固陵錄事參軍表弟周

元固惠酒爲作此詞

細腰宮外清明雨雲陽臺上煙如縷雲雨暗巫山流
人殊未還阿誰知此意解遣雙壺至至不是白頭新
周郎舊可人

雪花飛

攜手青雲路穩天聲迤邐傳呼袍笏恩章乍賜春滿
皇都何處難忘酒瓊花照玉壺歸嬾絲梢競醉雪
舞郊衢

浣溪沙舊刻四首攷西塞山邊白鳥飛是蘇子

瞻作刪去

飛鵲臺前近翠蛾千金新買帝青螺最難如意爲情
多幾處淚痕留醉袖一春愁思近橫波遠山低盡
不成歌

又

一葉扁舟捲畫簾老妻學飲伴清談人傳詩句滿江
南林下猿垂窺滌硯巖前鹿臥看收帆杜鵑聲亂
水如環

又

新婦磯頭眉黛愁
女兒浦口眼波秋
驚魚錯認月沈
鉤青箬笠前無限
事綠蓑衣底一時休
斜風細雨轉船頭

點絳脣重九日寄懷嗣直弟時再遊涪陵用東

坡餘杭九日點絳脣舊韻二首

濁酒黃花畫簾十日無秋
燕夢中相見似作枯禪觀
鏡裏朱顏又減
心情半江山遠
登高人健寄語東

飛雁

又

幾日無書舉頭欲問西來燕
世情夢幻復作如斯觀
自歎人生分合常
相半戎雖遠
念中相見不托魚

和雁

又

羅帶雙垂妙香長
恁攜纖手半妝紅
豆各自相思瘦
聞道伊家終日眉兒皺
不能勾淚珠輕溜
裏損揉藍袖

調笑令并詩

海上神仙字太真
昭陽殿裏稱心人
猶思一曲霓裳舞
散作中原胡馬塵
方士歸來說風度
梨花一

枝春帶雨分釵半
鈿愁殺人上皇倚闌獨無語
無語恨如許
方士歸時腸斷處
梨花一枝春帶雨
半鈿分釵親付
天長地久相思苦
渺渺鯨波無路

宴桃源書趙伯充家小姬領巾○一刻淮海集

略異○去歲迷藏花柳恰恰如今時候心緒
幾曾歡贏得鏡中消瘦生受生受更被養娘

催繡

天氣把人憊憊
落落絮遊絲時候
茶飯可曾炊
鏡中贏得消瘦
生受生受更被養娘催繡

山谷詞

山谷詩

長官更主受主受更更新養新新

天麻班入和烟烟谷紫紫新絲絲林林茶烟回會妙論中贏

對


然會游羸野機中斷更主受主受更更新養新

都異。去遺在歸芬將台台收台親知以歸

真將就書識由夫容小張聯中。一使部裝集

無餘別收指式士調排羅瀾與梁芥一妹春帶雨半

對春帶雨介險半險極送人上皇荷蘭對無語



魯直少時使酒玩世喜造纖淫之句法秀道人誠曰
筆墨勸淫應墮犁舌地獄魯直答曰空中語耳晚年
來亦閒作小詞往往借題棒喝拈示後人如效寶寧
勇禪師漁家傲幾闋豈其與桃葉團扇鬪妖豔耶古
虞毛晉記

觀于晉書

漢書中載有漢書其與物類圖志同其
 來亦不問其小同其主主昔國古不
 華漢書中載有漢書其與物類圖志同
 其主主昔國古不其入收其書書
 晉書中載有晉書其與物類圖志同其
 主主昔國古不其入收其書書



淮海詞

目錄

憶仙姿 七調

昭君怨 一調

調笑令 十調

生查子 一調

點絳脣 二調

浣溪沙 五調

採桑子 一調

菩薩蠻 二調

減字木蘭花 一調

好事近 一調

阮郎歸 五調

畫堂春 二調

海棠春 一調

一落索 一調

虞美人影 二調

迎春樂 一調

南歌子 三調

品令 二調

玉樓春 一調

鵲橋仙 一調

虞美人 三調

南鄉子 一調

踏莎行 一調

臨江仙 二調

蝶戀花 一調

河傳 二調

江城子 三調

千秋歲 一調

一叢花 一調

促拍滿路花 一調

滿園花 一調

八六子 一調

夢揚州 一調

滿庭芳 六調

雨中花慢 一調

長相思 一調

水龍吟 一調

鼓笛慢 一調

望海潮 四調

風流子 一調

沁園春 一調

八八五 一調

鷓鴣天 一調

玉照子 三調

點絳脣 一調

淮海詞目錄

真美人 三調

王對春 一調

南鄉子 三調

真美人 二調

幽棠春 一調

詞相 五調

蘇字木蘭 一調

料桑子 一調

揚柳 二調

鵬笑 十調

謝山 十調

目錄

蘇軾詞

淮海詞

宋 秦觀

憶仙姿 舊刻如夢令 五闋今增入二闋
門外鴉啼楊柳 春色著人如酒 睡起熨沈香 玉腕不勝金斗 消瘦消瘦 還是褪花時候

又

遙夜沈沈如水 風緊驛亭深閉 夢破鼠窺燈 霜送曉寒 侵被無寐 無寐 門外馬嘶人起

又

幽夢匆匆破後 妝粉亂紅 霑袖遙想酒醒來 無奈玉銷花瘦 回首回首 繞岸夕陽疎柳

又 或刻晏叔原

樓外殘陽紅滿 春入柳條 將半桃李 不禁風回首 落英無限 腸斷腸斷 人共楚天俱遠

又 或刻周美成

池上春歸何處 滿目落花飛絮 孤館悄無人 夢斷月堤歸路 無緒無緒 簾外五更風雨

又 此二闋舊本逸

門外綠陰千頃 雨雨黃鸝相應 睡起不勝情 行到碧梧金井 人靜人靜 風弄一枝花影

又

鶯嘴啄花紅溜燕尾點波綠皺指冷玉笙寒吹徹小
梅春透依舊依舊人與綠楊俱瘦

昭君怨 春日寓意 ○ 舊刻趙長卿

隔葉乳鴉聲軟號斷日斜陰轉楊柳小腰肢畫樓西
役損風流心眼眉上新愁無限極目送雲行此時
情

調笑令

漢宮選女適單于明妃斂袂登氈車玉容寂寞花
無主顧影徘徊泣路隅行行漸入陰山路目斷征
鴻入雲去獨抱琵琶恨更深漢宮不見空回顧
回顧漢宮路捍撥檀槽鸞對舞玉容寂寞花無主顧
影偷彈玉筋未央宮殿知何處目送征鴻南去

右王昭君

金陵往昔帝王州樂昌主第最風流一朝隋兵到
江上共抱悽悽去國愁越公萬騎鳴笳鼓劍擁玉
人天上去去空攜破鏡望紅塵千古江楓籠輦路
輦路江楓古樓上吹簫人在否菱花半壁香塵汗往
日繁華何處舊歡新愛誰爲主啼笑兩難分付

右樂昌公主

蒲中有女號崔徽輕似南山翡翠兒使君當日最
寵愛坐中對客常擁持一見裴郎心似醉夜解羅
衣與門吏西門寺裏樂未央樂府至今歌翡翠
翡翠好容止誰使庸奴輕輕點綴裴郎一見心如醉笑
裏偷傳深意羅衣深夜與門吏暗結城西幽會

右崔徽

尚書有女名無雙蛾眉如畫學新妝伊家仙客最
明俊舅母惟只呼王郎尚書往日先曾許數載睽
違今復遇聞說襄江二十年當時未必輕相慕
相慕無雙女當日尚書先曾許王郎明俊神仙侶腸
斷別離情苦數年睽恨今復遇笑指襄江歸去

右無雙

錦城春暖花欲飛灼灼當庭舞柘枝相君上客河
東秀自言那得旁人知妾願身爲梁上燕朝朝暮
暮長相見雲收月墜海沈沈淚滿紅綃寄腸斷
腸斷繡簾捲妾願身爲梁上燕朝朝暮暮長相見莫
遣恩遷情變紅綃粉淚知何限萬古空傳遺怨

右灼灼

百尺樓高燕子飛樓上美人顰翠眉將軍一去音
容遠只有年年舊燕歸春風昨夜來深院春色依

然人不可見只餘明月照孤眠回望舊恩空戀戀
戀戀樓中燕燕子樓空春日晚將軍一去音容遠空
鎖樓中深院春風重到人不見十二闌干倚徧

右盼盼

崔家有女名鶯鶯未識春光先有情河橋兵亂依
蕭寺紅愁綠慘見張生張生一見春情重明月拂
牆花影動夜半紅娘擁抱來脈脈驚魂若春夢
春夢神仙洞冉冉拂牆花樹動西廂待月知誰共更
覺玉人情重紅娘深夜行雲送因鞞釵橫金鳳

右崔鶯鶯

若耶溪邊天氣秋採蓮女兒溪岸頭笑隔荷花共
人語煙波渺渺蕩輕舟數聲水調紅嬌晚棹轉舟
回笑人遠腸斷誰家遊冶郎盡日踟躕臨柳岸
柳岸水清淺笑折荷花呼女伴盈盈日照新妝面水
調空傳幽怨扁舟日暮笑聲遠對此令人腸斷

右採蓮

鑒湖樓閣與雲齊樓上女兒名阿溪十五能爲綺
麗句平生未解出幽閨謝郎巧思詩裁翦能使佳
人動幽怨瓊枝璧月結芳期斗帳雙雙成眷戀
眷戀西湖岸湖面樓臺侵雲漢阿溪本是飛瓊伴風

月朱扉斜掩謝郎巧思詩裁翦能動芳懷幽怨

右煙中怨

深閨女兒嬌復癡春愁春恨那復知
舅兄唯有相拘意暗想花心臨別時
離舟欲解春江暮冉冉香魂逐君去
重來兩身復一身夢覺春風話心素
心素與誰語始信別離情最苦
蘭舟欲解春江暮精爽隨君歸去
異時攜手重來處夢覺春風庭戶

右離魂記

生查子時刻不載

眉黛遠山長新柳開青眼樓閣斷霞明
羅幕春寒淺杯嫌玉漏遲燭厭金刀
翦月色忽飛來花影和簾捲

點絳脣桃源○或刻蘇子瞻

醉漾輕舟信流引到花深處塵緣相誤
無計花間住煙水茫茫回首斜陽暮
山無數亂紅如雨不記來時路

又

月轉烏啼畫堂宮徵生離恨美人愁悶
不管羅衣褪清淚斑斑揮斷柔腸寸
嗔人問背燈偷搵拭盡殘妝粉

浣溪沙 此首或刻歐陽永叔

漠漠輕寒上小樓
曉陰無賴似窮秋
澹煙流水畫屏幽
自在飛花輕似夢
無邊絲雨細如愁
寶簾閒挂小銀鉤

又亦刻歐陽永叔

香靨凝羞一笑開
柳腰如醉暖相挨
日長人困下樓臺
照水有情聊整鬢
倚闌無緒更兜鞋
眼邊牽恨懶歸來

又

霜縞同心翠黛連
紅綃四角綴金錢
惱人香爇是龍涎
枕上忽收疑是夢
燈前重看不成眠
又還一段惡姻緣

又

脚上鞦兒四寸羅
脣邊朱粉一櫻多
見人無語但回波
料得有心憐宋玉
只應無奈楚襄何
今生有分共伊麼

又或刻張子野

錦帳重重捲暮霞
屏風曲曲鬪紅牙
恨人何事苦離家
枕上夢魂飛不去
覺來紅日又西斜
滿庭芳草襯殘花

採桑子 元刻醜奴兒

夜來酒醒清無夢，愁倚闌干。露滴輕寒，雨打芙蓉淚不乾。
佳人別後音塵悄，瘦盡難拚。明月無端，已過紅樓十二間。

菩薩蠻

蟲聲泣露驚秋枕，羅幃淚溼鴛鴦錦。獨臥玉肌涼，殘更與恨長。
陰風翻翠幔，雨澀燈花暗。畢竟不成眠，鴉啼金井寒。

又時刻不載

金風簌簌驚黃葉，高樓影轉銀蟾匝。夢斷繡簾垂，月明烏鵲飛。
新愁知幾許，欲似柳千絲。雁已不堪聞砧聲，何處村。

減字木蘭花

天涯舊恨，獨自淒涼，人不問、欲見回腸。斷盡金爐小篆香。
黛蛾長斂，任是東風吹不轉，困倚危樓過盡飛鴻字字愁。

好事近 夢中作

春路雨添花，花動一山春色。行到小溪深處，有黃鸝千百。
飛雲當面化龍蛇，天矯轉空碧。醉臥古藤陰下，了不知南北。

阮郎歸

褪花新綠漸團枝
撲人風絮飛
鞦韆未拆
水平堤
落紅成地衣
遊蝶困乳鶯
啼怨春春
怎知日長
早被酒禁持
那堪更別離

又

宮腰裊裊翠鬟鬆
夜堂深處逢
無端銀燭殞
秋風靈犀得
暗通更有
有限恨無窮
星河沈曉
空隴頭
流水各西東
佳期如夢中

又

瀟湘門外水平鋪
月寒征棹孤
紅妝飲罷
少踟躕
有人偷向隅
揮玉筯
灑真珠
梨花春雨
餘人人盡道
斷腸初
那堪腸也無

又

湘天風雨破寒初
深深庭院虛
麗譙吹罷
小單于
迢迢清夜徂
鄉夢斷
旅魂孤
崢嶸歲又
除衡陽猶有雁傳書
郴陽和雁無

又舊刻醉桃源另見今併入

碧天如水月如眉
城頭銀漏遲
綠波風動
畫船移
嬌羞初見時
銀燭暗
翠簾垂
芳心兩自知
楚臺魂斷曉雲飛
幽歡難再期

畫堂春

落紅鋪徑水平池
弄晴小雨霏霏
杏園顛顛杜鵑啼
無奈春歸
柳外畫樓獨上
任兒闌手撚花枝
放花無語對斜暉
此恨誰知

又或刻山谷年十六作

東風吹柳日初長
雨餘芳草斜陽
杏花零亂燕泥香
睡損紅妝
寶篆煙消
龍鳳畫屏雲鎖
瀟湘夜寒微
透薄羅裳無限思量

海棠春舊刻不載

流鶯窗外啼聲巧
睡未足把人驚
覺翠被曉寒輕
寶篆沈煙裊
宿醒未解
宮娥報道
別院笙歌會
早試問海棠花
昨夜開多少

一落索

楊花終日飛舞
奈久長難駐
海潮雖是暫時來
却有箇堪憑處
紫府碧雲爲路
好相將歸去
肯如薄倖
五更風不解
與花爲主

虞美人影

秦樓深鎖薄情種
清夜悠悠誰共
羞見枕衾鴛鳳悶
卽和衣擁
無端畫角嚴城動
驚破一番新夢
窗外月華霜重
聽徹梅花弄

又時刻不載

碧紗影弄東風曉一夜海棠開了枝上數聲啼鳥妝
點知多少 妒雲恨雨腰肢裊眉黛不堪重掃薄倖
不來春老羞帶宜男草

迎春樂

菖蒲葉葉知多少惟有箇蜂兒妙雨晴紅粉齊開了
露一點嬌黃小 早是被曉風力暴更春共斜陽俱
老怎得花香深處作箇蜂兒抱花香原作香香恐是
當時語

南歌子 贈陶心兒

玉漏迢迢盡銀潢淡淡橫夢回宿酒未全醒已被鄰
雞催起怕天明 臂上妝猶在襟閒淚尚盈水邊燈
火漸人行天外一鉤殘月帶三星

又

愁鬢香雲墜嬌眸冰玉裁月幌風幌爲誰開天外不
知音耗百般猜 玉露沾庭砌金風動瑄灰相看有
似夢初回只恐又拋人去幾時來

又

香墨彎彎畫燕脂淡淡勻揉藍衫子杏黃裙獨倚玉
闌無語點檀脣 人去空流水花飛半掩門亂山何

處覓行雲又是一鉤新月照黃昏

品令

幸自得一分索強教人難喫好好地惡了十來日恰而今較些不須管啜持教笑又也何須肱織衝倚賴臉兒得人惜放軟頑道不得

又

掉又臞天然箇品格於中壓一簾兒下時把鞦兒踢語低低笑咭咭每每秦樓相見見了無限憐惜人前強不欲相沾識把不定臉兒赤

玉樓春

秋容老盡芙蓉院草上霜花勻似翦西樓促坐酒杯深風壓繡簾香不捲玉纖慵整銀箏雁紅袖時籠金鴨暖歲華一任委西風獨有春紅留醉臉

鵲橋仙

纖雲弄巧飛星傳恨銀漢迢迢暗度金風玉露一相逢便勝却人間無數柔情似水佳期如夢忍顧鵲橋歸路兩情若是久長時又豈在朝朝暮暮

虞美人

高城望斷塵如霧不見聯驂處夕陽村外小灣頭只有柳花無數送歸舟瓊枝玉樹頻相見只恨離人

遠欲將幽恨寄青樓爭奈無情江水不西流

又

碧桃天上栽和露不是凡花數亂山深處水縈洄可惜一枝如畫爲誰開
輕寒細雨情何限不道春難管爲君沈醉又何妨祇怕酒醒時候斷人腸

又

行行信馬橫塘畔煙水秋平岸綠荷多少斜陽中知爲阿誰凝恨背西風
紅妝艇子來何處蕩槳偷相顧鴛鴦驚起不無愁柳外一雙飛去却回頭

南鄉子

妙手寫徽真水翦雙眸點絳脣疑是昔年窺宋玉東鄰只露牆頭一半身
往事已酸辛誰記當年翠黛顰盡道有些堪恨處無情任是無情也動人

踏莎行 郴州旅舍

霧失樓臺月迷津渡桃源望斷無尋處可堪孤館閉春寒杜鵑聲裏斜陽暮
驛寄梅花魚傳尺素砌成此恨無重數郴江幸自繞郴山爲誰流下瀟湘去坡翁絕愛此詞尾兩句自書于扇云少游已矣雖萬人何贖釋天隱註三體唐詩謂此二句實自沅湘日夜東流去不爲愁人住少時變化然擲之恣彼泉水亦

流于淇已有此意秦公蓋出諸此又王直方詩話載
黃山谷惜此詞斜陽暮意重欲易之未得其字今柳
誌遂作斜陽度愚謂此亦何害而病其重也李太白
詩暍彼落日暮卽斜陽暮也劉禹錫烏衣巷口夕陽
斜杜工部山木蒼蒼落日曛皆此意別如韓文公紀
夢詩中有一人壯非少石鼓歌安置妥帖平不頗之
類尤多豈可亦謂之重耶山谷當無此言卽誠出山
谷亦豈足爲定論耶

臨江仙

千里瀟湘接藍浦蘭橈昔日曾經月高風定露華清
微波澄不動冷浸一天星獨倚危樓情悄悄遙聞
妃瑟泠泠新聲含盡古今情曲終人不見江上數峯
青

又

髻子偎人嬌不整眼兒失睡微重尋思模樣早心忪
斷腸攜手處何事太怱怱不忍殘紅猶在臂翻疑
夢裏相逢遙憐南埭上孤篷夕陽流水紅滿淚痕中

蝶戀花

曉日窺軒雙燕語似與佳人共惜春將暮屈指豔陽
都幾許可無時霎閒風雨流水落花無問處只有

飛雲冉冉來還去持酒勸雲雲且住憑君礙斷春歸路

河傳

亂花飛絮又望空鬪合離人愁苦那更夜來一霎薄
情風雨暗掩將春色去籬枯壁盡因誰做若說相
思佛也眉兒聚莫怪爲伊抵死縈腸惹肚爲沒教人
恨處

又

恨眉醉眼甚輕輕覷著神魂迷亂常記那回小曲闌
干西畔鬢雲鬆羅襪刻丁香笑吐嬌無限語軟聲
低道我何曾慣雲雨未諧早被東風吹散瘦煞人天
不管

江城子

西城楊柳弄春柔動離憂淚難收猶記多情曾爲繫
歸舟碧野朱橋當日事人不見水空流韶華不爲
少年留恨悠悠幾時休飛絮落花時候一登樓便做
春江都是淚流不盡許多愁

又

南來飛燕北歸鴻偶相逢慘愁容綠鬢朱顏重見兩
衰翁別後悠悠君莫問無限事不言中
小槽春酒

滴珠紅莫怱怱滿金鍾飲散落花流水各西東後會
不知何處是煙浪遠暮雲重

又

棗花金釧約柔荑昔曾攜事難期咫尺玉顏和淚鎖
金閨恰似小園桃與李雖同處不同枝玉笙初度
顫鸞篋落花飛爲誰吹月冷風高此恨只天知任是
行人無定處重相見是何時

千秋歲謫虔州日作

水邊沙外城郭春寒退花影亂鶯聲碎飄零疎酒盞
離別寬衣帶人不見碧雲暮合空相對憶昔西池
會鵷鷺同飛蓋攜手處今誰在日邊清夢斷鏡裏朱
顏改春去也飛紅萬點愁如海

一叢花

年時今夜見師師雙頰酒紅滋疎簾半捲微燈外露
華上煙裊涼颺簪髻亂拋偎人不起彈淚唱新詞
佳期誰料久參差愁緒暗縈絲想應妙舞清歌罷又
還對秋色嗟咨惟有畫樓當時明月兩處照相思

促拍滿路花一無促拍二字

露顆添花色月彩投窗隙春思如中酒恨無力洞房
咫尺曾寄青鸞翼雲散無蹤跡羅帳熏殘夢回無處

尋覓輕紅膩白步步熏蘭澤約腕金環重宜裝飾
未知安否一向無消息不似尋常憶憶後教人片時
存濟不得

滿園花

一向沈吟久淚珠盈襟袖我當初不合苦攔就慣縱
得軟頑見底心先有行待癡心守甚捻著脈子倒把
人來儻懣近日來非常羅阜醜佛也須眉皺怎掩
得衆人口待收了孛羅罷了從來斗從今後休道共
我夢見也不能得勾

八六子 春怨

倚危亭恨如芳草淒淒刻盡還生念柳外青驄別後
水邊紅袂分時悽然暗驚無端天與娉婷夜月一
簾幽夢春風十里柔情怎奈何歡娛漸隨流水素絃
聲斷翠綃香減那堪片片飛花弄晚濛濛殘雨籠晴
正銷凝黃鸝又啼數聲

夢揚州

晚雲收正柳塘煙雨初休燕子未歸惻惻輕寒如秋
小欄外東風軟透繡幃花密香稠江南遠人何處鷓
鴒啼破春愁長記曾陪燕遊酬妙舞清歌麗錦纏
頭帶酒困花十載因誰淹留醉鞭拂面歸來晚望翠

樓簾捲金鉤佳會阻離情正亂頻夢揚州

滿庭芳

山抹微雲天粘衰草畫角聲斷譙門暫停征棹聊共
引離尊多少蓬萊舊事空回首煙靄紛紛斜陽外寒
鴉數點流水繞孤村 消魂當此際香囊暗解羅帶
輕分漫贏得青樓薄倖名存此去何時見也襟袖上
空染啼痕傷情處高城望斷燈火已黃昏天粘衰草
今本改粘作連非也韓文洞庭漫汗粘天無壁張祐
詩草色粘天鷓鴣恨山谷詩遠水粘天吞釣舟邵博
詩平浪勢粘天趙文昇詞玉關芳草粘天碧嚴次山
詞粘雲紅影傷千古葉夢得詞浪粘天蒲桃漲綠劉
行簡詞山翠欲粘天劉叔安詞暮煙細草粘天遠粘
字極工且自出處若作連天是小兒之語也

又

紅蓼花繁黃蘆葉亂夜深玉露初零霽天空闊雲淡
楚江清獨棹孤篷小艇悠悠過煙渚沙汀金鉤細絲
綸慢捲牽動一潭星 時時橫短笛清風皓月相與
忘形任人笑生涯泛梗飄萍飲罷不妨醉臥塵勞事
有耳誰聽江風靜日高未起枕上酒微醒

又

碧水驚秋黃雲凝暮敗葉零亂空堦洞房人靜斜月照徘徊又是重陽近也幾處處砧杵聲催西窗下風搖翠竹疑是故人來傷懷憎悵望新權易失往事難猜問籬邊黃菊知為誰開謾道愁須殢酒酒未醒愁已先回憑闌久金波漸轉白露點蒼苔

又詠茶○或刻黃山谷

北苑研膏方圭圓璧萬里名動京關碎身粉骨功合上凌煙尊俎風流戰勝降春睡開拓愁邊纖纖捧香泉濺乳金縷鷓鴣斑相如方病酒一觴一詠賓友羣賢為扶起燈前醉玉頰山搜攪胸中萬卷還傾動三峽詞源歸來晚文君未寢相對小妝殘

又向誤王觀

晚色雲開春隨人意驟雨方過還晴高臺芳樹飛燕蹴紅英舞困榆錢自落鞦韆外綠水橋平東風裏朱門映柳低按小秦箏多情行樂處珠鈿翠蓋玉轡紅纓漸洒空金榼花困蓬瀛豆蔻梢頭舊恨十年夢屈指堪驚凭闌久疎煙淡日寂寞下蕪城今本誤作晚兔雲開不通維揚張統刻詩餘譜以意改兔作見亦非按花菴詞選作晚色雲開今從之

又茶詞

雅燕飛觴清談揮塵使君高會羣賢密雲雙鳳初破
縷金團窗外爐煙似動開尊試一品奔泉輕淘起香
生玉乳雪濺紫甌圓 嬌鬟宜美盼雙擎翠袖穩步
紅蓮坐中客翻愁酒醒歌闌點上紗籠畫燭花驄弄
月影當軒頻相顧餘歡未盡欲去且留連

雨中花慢

點指虛無征路醉乘斑蚪遠訪西極見天風吹落滿
空寒皇女明星迎笑何苦自淹塵域正火輪飛上霧
捲煙開洞觀金碧 重重觀閣橫枕鼇峯水面倒銜
蒼石隨處有奇香幽火杳然難測好是蟠桃熟後阿
環偷報消息在天碧海一枝難遇占取春色

長相思

鐵甕城高蒜山渡闊千雲十二層樓開尊待月掩箔
披風依然燈火揚州綺陌南頭記歌名宛轉鄉號溫
柔曲檻俯清流想花陰誰繫蘭舟 念淒絕秦絃感
深荆賦相望幾許凝愁勤勤裁尺素奈雙魚難渡瓜
洲曉鑿堪羞潘鬢點吳霜漸稠幸于飛鴛鴦未老不

水龍吟 贈妓樓東玉

小樓連苑橫空下窺繡轂雕鞍驟疎簾半捲單衣初
試清明時候破暖輕風弄晴微雨欲無還有賣花聲

過盡斜陽院落紅成陣飛鴛鴦
玉佩丁東別後悵
佳期參差難又名韁利鎖天還知道和天也瘦花下
重門柳邊深巷不堪回首念多情但有當時皓月照
人依舊

鼓笛慢

亂花叢裏曾攜手窮豔景迷歡賞到如今誰把雕鞍
鎖定阻遊人來往好夢隨春遠從前事不堪思想念
香闥正杏佳歡未偶難留戀空惆悵
永夜嬋娟未
滿嘆玉樓幾時重上那堪萬里却尋歸路指陽關孤
唱苦恨東流水桃源路欲回雙槳仗何人細與叮嚀
問呵我如今怎向

望海潮 廣陵懷古

星分牛斗疆連淮海揚州萬井提封花發路香鶯啼
人起朱簾十里春風豪俊氣如虹曳照春金紫飛蓋
相從巷入垂楊畫橋南北翠煙中
追思故國繁雄
有迷樓挂斗月觀橫空紋錦製帆明珠濺雨寧論雀
馬魚龍往事逐孤鴻但亂雲流水縈帶離宮最好揮
毫萬字一飲拚千鍾

又越州懷古

秦峯蒼翠耶溪瀟灑千巖萬壑爭流鴛瓦雉城譙門

畫戟蓬萊燕閣三休天際識歸舟汎五湖煙月西子
同遊茂草荒臺苧羅村冷起閒愁 何人覽古凝眸
悵朱顏易失翠被難留梅市舊書蘭亭古墨依稀風
韻生秋狂客鑑湖頭有百年臺沼終日夷猶最好金
龜換酒相與醉滄洲

又洛陽懷古

梅英疎淡冰澌溶洩東風暗換年華金谷俊游銅駝
巷陌新晴細履平沙長記誤隨車正絮翻蝶舞芳思
交加柳下桃蹊亂分春色到人家 西園夜飲鳴笳
有華燈礙月飛蓋妨花蘭苑未空行人漸老重來是
事堪嗟煙暝酒旗斜但倚樓極目時見棲鴉無奈歸
心暗隨流水到天涯

又別意

奴如飛絮郎如流水相沾便肯相隨微月戶庭殘燈
簾幕忽忽共惜佳期纔話暫分攜早抱人嬌咽雙淚
紅垂畫舸難停翠幃輕別兩依依 別來怎表相思
有分香帕子合數松兒紅粉脆痕青牋嫩約丁寧莫
遣人知成病也因誰更自言秋杪親去無疑但恐生
時注著合有分于飛

風流子 初春

東風吹碧草年華換行客老滄洲見梅吐舊英柳搖
新綠惱人春色還上枝頭寸心亂北隨雲黯黯東逐
水悠悠斜日半山暝煙兩岸數聲橫笛一葉扁舟
青門同攜手前歡記渾似夢裏揚州誰念斷腸南陌
回首西樓算天長地久有時有盡奈何綿綿此恨無
休擬待倩人說與生怕人愁

沁園春春思

宿靄迷空膩雲籠日晝景漸長正蘭皋泥潤誰家燕
喜蜜脾香少觸處蜂忙盡日無人簾幕挂更風遞遊
絲時過牆微雨後有桃愁杏怨紅淚淋浪風流寸
心易感但依依竚立回盡柔腸念小奩瑤鑑重勻絳
蠟玉籠金斗時熨沈香柳下相將遊冶處便回首青
樓成異鄉相憶事縱蠻牋萬疊難寫微茫

少游謫藤州一日醉野人家作此詞本

集不載見于地志或不識咎字妄改可笑

喚起一聲人悄衾冷夢寒窗曉瘴雨過海棠開春色
又添多少社甕釀成微笑半缺柳瓢共咎覺傾倒
急投牀醉鄉廣大人間小

鷓鴣天舊刻逸


枝上流鶯和淚聞新啼痕間舊啼痕一春魚鳥無消

息千里關山勞夢魂
無一語對芳尊
安排腸斷到
黃昏甫能炙得燈兒了
雨打梨花深閉門

淮海詞

五梅圖

長十里關山幾幾
無一語教教教教
用



晁氏曰今代詞手惟秦七黃九或謂詞尚綺豔山谷特瘦健似非秦比朝溪子謂少游歌詞當在東坡上但少游性不耐聚稿間有淫章醉句輒散落青帘紅袖閒雖流播舌眼從無的本余旣訂譌搜逸共得八十七調集爲一卷亦未敢曰無闕遺也古虞毛晉記



國家圖書館



002512067

